

# WANTOK

NIUSPEPA BILONG YUMI OL PAPUA NIUGINI STRET - 26 YIA NAU

24 pes      Namba 1,181      Wik i stat long Fonde, Februeri 13, 1997      50 toea

## Somare i laik kamap PM gen

PAPA bilong Pangu, Sir Michael Somare i tokaut olsem em bai resis long kamap praim minista bihain long 1997 ileksen.

Sir Michael Somare i tok em bai resis long nem bilong pikinini bilong em Pangu. Em i tokaut long dispela bihain long Pangu Pati i rausim nem bilong em long pati.

Em i tok ol pipel i laikim Somare yet na em i kisim bikpela sapot tru long ol pipel long wanem hap em i raun long en.

Somare i gat 61 krismas nau na em i tok em inap yet long resis long kisim wok bilong praim minista.

Sir Michael Somare bai i go pas long ol memba bilong grup em ol i kolim Nesanel Alaiens. Ol narapela lain i stap insait long dispela grup em Stephen Pokawin wantaim lain bilong em, Melanesian Alaiens Pati na ol lain PDM em Masket langalio i go pas long ol.

Ilektoral Komisina Reuben Kaiulo i tokaut dispela wik olsem bai poto bilong Somare i no inap kamap long vot pepa long sapotim ol kendidet em i makim long

1997 ileksen. Mista Kaiulo i tok as bilong dispela em bikos Nesanel Alaiens em i no wanela rejistet politikal pati. Em i tok dispela grup em ol lain husat i meba bilong ol narapela pati i bung wantaim long kamapim.

Pangu Pati i tokaut las wik olsem ol i rausim pinis nem bilong Somare. Na pati bai mekim bikpela toksave nau long ol pipel olsem Somare i no moa lida bilong pati.

Ol eksekutiv na memba bilong Pangu i bin bung long ples Uritai long Galp Provins long wiken na pasim tok long plan bilong ol long 1997 ileksen. Ol i tokaut tu long nem bilong ol kendidet long sampela sit.

Nesanel Plening Minista, na memba bilong Kairuku Hiri, Moi Avei i tok em i taim bilong pati long lusim Somare nau na larim ol yangpela lida i go pas long wok.

Tasol planti toktok i kamap long ol brens presiden husat i tok nau em i taim bilong klaim tingting long dispela olpela bilip, "Pangu em Somare na Somare em i Pangu". Ol i tok Somare i putim sampela kendidet bilong


em yet na dispela i ken bagarapim sans bilong ol Pangu kendidet long ileksen.

Mista Avei i tok ol pipel i lus ting tu long bikpela wokol Pangu lida olsem Sir Pita Lus na Sir Albert Maori Kiki i bin mekim long strongim nem bilong Pangu insait long kantri. Em i tok ol pipel bilong Papua i bin givim bikpela sapot tru long Pangu long taim Somare i bin go pas long pati na nau em i taim bilong ol narapela rijon long givim wankain sapot long Chris Haiveta, nupela lida bilong Pangu.

Dispela kibung i bin makim gen Pate Wamp olsem presiden bilong Pangu na Moses Taian i nupela seketeri bilong pati.

Olgeta deleget husat i stap long dispela kibung i primis long givim K10 long pati na Mista Haiveta i tokaut tu olsem olgeta 23 Pangu memba long Palamen bai yusim mani bilong ol yet long resis lon ileksen. Em i tok bai ol i helpim ol narapela kendidet long baim nominesen fi na printim ol posta.

Moa ripot long pes 5



### Redi long kisim pawa...

• Joe Gawi (rait han) wanela kendidet bilong Is Sepik Rijinel Sit i redi long go insait long haus boi bilong ol blak wara pipel long Tungumbit.

Ol pipel long Tungumbit i stori olsem ol i bin givim wankain pawa olsem long papa bilong Sir Michael Somare, Thomas Somare taim em i bin go askim ol.

Tasol nau ol i givim dispela pawa i go long han bilong Joe Gawi olsem dispela i ken helpim em long dispela ileksen. Narapela man husat i sanap wantaim Joe Gawi em Louie Mek wanela kendidet bilong Angoram Open sit. *Poto joe kanekane*

INSAIT	• Sios haus sik bungim hevi. pes 2	• Katolik Komisn helpim pipel. pes 2	• Kot raunsim kot bilong salim meri. pes 3	• Tripela Sepik lida lusim Somare. pes 3
	• Hevi long Watut gol maina. pes 4	• Pangu na Somare ripot. pes 5		

**OLPELA**  
**MUTRUS**  
**I KAM**  
**BEN**

**MUTRUS**

# MUTRUS

MAJOR SPONSA BILONG RUGBY LEAGUE INSAIT LONG PAPUA NIUGINI

GOVERNMENT WARNING SMOKING IS DANGEROUS TO HEALTH

# 4-pela sios haus sik long Madang bai pas

RIPOT i kamap gen olsem ol sios helt senta long kantri i bungim hevi long moni i sot olsem na sampela haus sik we ol sios i ranim bai i pas.

I gat ripot olsem 4-pela sios hau sik long Madang provins klostu bai i pas bikos ol i no kisim inap moni i kam long provinsal gavman bilong lukautir na ronim wok bilong ol. Ol dispela helt senta em ; Yagaum, Yaubin, Mugum na Alexshafen.

Ol ripot i tok ol sios helt woka long dispela 4-pela haus sik i no bin kisim potnait pe bilong ol insait long 5-pela wik nau.

Olpela siaman bilong Sios Medikol Kaunsil na nau seke-teri bilong Lutheran Helt Sevis Don Kurdan i tok ol bikman

## ... sapos nogat moni

bilong sios helt sevis long Madang bai i holim wanpela miting wantaim ol provinsal atoriti. Na sapos nogat gutpela toktok i kamap, ol sios bai i traim painim sampela rot bilong daunim dispela hevi.

Mista Kurdan i tok stat long mun Desemba las yia, ol sios helt sevis long provins i no bin gat inap moni bilong baim ol bil bilong haus sik na tu long karimaut ol projek insait long ol wan wan haus sik we sios i lukautim.

Em i tok sapos ol sios i no kisim wanpela helpim, ol helt sios helt sevis bai i bagarap taim ol sik manmeri na pikinini i slip i stap yet long ol bet bilong ol (long haus sik).

Olpela Gavana bilong Madang provins na nau Minista bilong Provinsal na Lokol Levul Gavman Peter Barter i bin salim wanpela pas i go long Madang Provinsal Gavman long kwiktaim painim sampela moni long helpim ol helt senta sios i save lukautim, we i wok long bungim hevi long dispela taim.

Em i bin tok ol i mas givim wankain luksave i go long ol sios helt wokmanmeri, olsem ol pablik sevan bilong gavman. Na i no olsem ol seken klas manmeri long kantri.

Edministrata bilong Gaubin Helt Senta, Chris Drew i bin tok moni we provinsal gavman

i bin katim bilong ol long ranim ol wok bilong ol na tu baim ol wokman em i go daun tru long dispela yia. Long las yia, ol i bin kisim K24,000 bilong mekim wankain wok. Tasol long dispela yia, mak bilong moni i bin go daun tru long K12,000.

Mista Drew i bin tok ol i wok long yusim tasol moni we ol sik manmeri i save baim olsem haus sik fi bikos ol i no kisim yet wanpela moni i kam long gavman. Sapos ol i no kisim wanpela helpim wantaim moni, bai ol i pasim sampela haus sik wod na larim liklik namba tasol i stap, salim planti wok manmeri i go long ples na pasim autpesen we ol sik manmeri na pikinini i save go long olgeta de bilong kisim marasin.

# Katolik komisnin givim pawa long ol pipel

Las yia i kam inap nau, Katolik Komisnin bilong Jastis, Pis na Developmen (CCJPD) i wok long mekim ileksen awenes long olgeta hap bilong Papua Niugin. Dispela ileksen awenes em bilong givim sampela gutpela tingting long ol pipel bilong PNG bai ol i kamapim gutpela ileksen long dispela yia. Bai ol i painim ol gutpela lida na gavman bilong ol.

Dispela yia, 1997 CCJPD i kirapim gen wok bilong ol long skulim ol manmeri bilong Papua Niugini long pasin bilong bihainim long ileksen. Dispela em bikos dispela yia 1997 em yia bilong olgeta manmeri bilong Papua Niugini bai i go long nesanel ileksen long mun Jun na Julai.

Ripot i kam long Developmen Edukesen Opisa bilong CBC, Peter Maime i tok

taim bilong ileksen em wanpela bikpela de tru bilong mipela ol pipel long putim mak bilong mipela long balot pepa. Dispela mak bai tok long wahem kain lidasip na gavman yumi bai gat bihain long ileksen. Planti hap bilong graun ol pipel i gat laik tru long makim gavman bilong ol, tasol sampela strongpela lo i tambuim ol. Dispela kain lo i save stap long ples we ol ami na polis i save lukautim wok bilong gavman.

Ripot bilong Mista Maime i tok yumi bin kisim independens long yia 1975. Yumi gat demokratik sistem bilong gavman. Dispela i min, pawa i stap long yumi. Yumi yet i ken kamapim gavman na tu yumi yet i ken rausim bikos em samting yumi i papa long en.

Mista Maime i tok gutpela gavman em yumi. Gutpela lida em yumi. Yumi ol manmeri husat bai vot long namba seven mun long dispela yia, yumi mas votim ol man na meri husat bai lukautim yumi na kantri bilong yumi.

Em i tok long painim ol gutpela lida bilong kantri, yumi ol pipel i gat bikpela wok tru. Yumi mas no ken votim ol man na meri husat i gat rekot nogut bilong trikim ol pipel bilong ol, i save kirapim trabel na i no save bihainim lo na save putim ol yet namba wan, daunim na krungutim ol arapela manmeri.

Ripot bilong Mista Maime i tok paul pasin long gavman i save kamap taim ol manmeri yumi votim ol i go long nesanel palamen i gat pasin bilong tingim ol wankain na famili bilong ol yet. Na tu ol i save baim vot bilong ol wantaim moni, frisa mit, banis waia, bia na ol narapela samting.

Em i tok vot bilong yumi em i olsem mak o piksa bilong yumi yet. Em i makim laip bilong yumi. Sapos yumi salim wok bilong yumi olsem wanpela samting nating, orait yumi mas save olsem yumi salim laip bilong yumi wantaim.

Yumi mas askim yumi yumi yet, yumi husat. Em i tok taim yumi askim dispela kwesten yumi bai luksave olsem yumi no longlong olsem pik o dok. Yumi bai save olsem yumi wanpela man o meri. Bai yumi save olsem yumi spesel.

Mista Maime i tok yumi gat pawa long toktok, glasim na skelim ol samting. Ol kendidet i save laik long yusim ol pipel long kisim namba na biknem. Dispela kain pasin i no stret. Ol pipel mas oltaim stap namba wan na ol kendidet mas kempen long stretpela pasin.

Peter Maime  
Development Edukesen Opisa  
Ileksen awenes kodineta



• Piksa i soim mama Yape lakuwe wantaim aiglas i sindaun na ol pikinini na tumbuna bilong em i stap wantaim em long taim em i selebretim 80 yias bilong em long Sogoru viles, Lowa Bena, Isten Hailens long de wan bilong 1997. Foto: Sape Metta



• Ol yut grup membas bilong Lankuwam insait long Makam Veli i redim ol gumi bilong ol long karim kaikai i go long Yanuf. Foto: Watson Gabana.

## WANTOK

All departments. Phone: 325 2500 - Fax: 325 2579  
P.O. Box 1982, Boroko, NCD, Papua New Guinea

Published Weekly, Thursday, for  
Word Publishing Company Pty. Ltd.

Printed and published by Anna Solomon of Bittern Place, Gordons,  
at Allotment 2, Section 209, Spring Garden Road, Hohola for Word  
Publishing Co. Pty Ltd.

Acting General Manager and  
Group Editor in Chief Anna  
Solomon

Advertising Manager James DeLisle

Editor of Wantok Leo Walfwa

Advertising Deadlines  
Display Bookings and  
Camera ready copy Tuesday  
midday  
Classified Advertising Wednesday  
2pm

Papers distributed by air  
throughout PNG

Available by airmail subscription  
within Papua New Guinea and  
overseas.

Australia and New Zealand  
Representatives: Tonkin Media  
Pty Ltd P.O. Box 101, Avoca  
Beach, NSW, 2251 Australia  
Sydney, James Tonkin, (043)  
851746, Melbourne, Glen Smith,  
(03) 8072311

Word Publishing Company Pty Ltd is owned by the four major churches  
of Papua New Guinea: Catholic 55%, Lutheran 25%, Anglican 10% and  
United 10%. The company reserves the right to accept or reject any  
advertisement or other material submitted for publication which it deems  
contrary to the public interest at its absolute discretion. The publisher's  
general terms of acceptance are available at Word Publishing Company  
Pty. Ltd., and are set out in full on the reverse side of its official Display  
Advertising Booking Form.

# WANTOK

NIUSPEPA BILONG OL PNG STRET

## Taim bilong skelim laip na helpim komyuniti

Dispela wik em i begin bilong lent. Yumi ol Kristen manmeri i redi long taim bilong lsta. Lent em i taim bilong tambu long ol samting bilong graun em yumi manmeri i save laikim tru. Sampela bai i tambu long smok o kaikai buai o dring. Em i olsem spesel sakrifais long dispela taim.

Ating yumi wan wan i ken lukluk long laip bilong yumi long dispela taim na skelim ol kain samting olsem. Yumi givim baksait long ol kain pasin em i no inap long helpim laip bilong yumi na strongim ol wok em inap helpim sindaun bilong ol narapela manmeri.

"Mi pasin" i strong tru tude. Yumi putim amamas bilong yumi i go pas na lusim ting long brata na susa bilong yumi. Dispela kain pain i mas pinis nau. Planti tabel na traim i kamap long kantri bilong yumi tude bikos long dispela kain pasin bilong tingim yumi yet na givim baksait long ol narapela manmeri.

Dispela yia 1997 em i wanpela bikpela yia long Papua Niugini. I gat ileksen bai i kamap. Ol nupela memba yumi makim long dispela ileksen bai lidim kantri i go insait long yia 2000. Yumi laik lukim PNG i stap yet long tudak long yia 2000 o nogat?

Yumi mekim wanem long daunim ol hevi i kamap long komyuniti bilong yumi? Ating planti bilong yumi bai i sem long bekim bikos yumi no mekim wanpela samting. Yumi larim dispela wok i stap long han bilong ol plisan na ol viles kot mejistret na ol komyuniti lida long stretim. Yumi no laik stap insait long ol grup i helpim komyuniti bikos em i hatwok, o bikos i nogat pe, o bikos i no gat profit, o bikos yumi no laik givim fri taim bilong yumi long helpim narapela manmeri.

Long taim bilong lent, ating em i gupela sapos yumi wan wan i skelim ol dispela samting na traim stretim. Em i no isi, bai yumi pilimi pen. Tasol dispela pen i no bikpela tumas na em i pen we bai i karim gupela kaikai bikos yumi mekim liklik wok long helpim komyuniti bilong yumi.

# Kot rausim toktok bilong salim meri

NESENEL kot long Hagen i rausim disisen bilong bihainim pasin tumbuna long yusim yangpela meri olsem kompensesen long Minz insait long Westen Hailans provins long mun Me las yia.

Jas Salamo Injia i tokaut long disisen bilong kot long dispela wik Mandé na tok olsem pasin bilong ol pipel long Minz wantaim ol lain bilong Tangilka na Konumbuka long yusim kastom na putim meri olsem het pe i no stret. Na dispela i egensim lo bilong Papua Niugini.

Jas Injia i tok ol pipel i no inap yusim kastom o pasin

tumbuna long givim Miriam Willinat olsem wanpela kompensesen peme i go long ol lain bilong papa bilong em husat ol polisman i bin sutim indai taim ol i painim wanpela man nogut insait long Tangilla haus lain.

Ol mama lain bilong Koidam Willingal, papa bilong Miriam i askim long kompensesen olsem pik, moni na ol arapela samting tu wantaim meri Miriam antap.

Ol lain Tangilka i tok orait long yusim kastom pasin na givim Miriam i go long ol Konumbuka haus lain long maritim wanpeal man lon ghap

long mun Me long las yia.

Tasol dispela i no kamap long laik na tingting bilong yangpela meri. Individol Komyuniti Rait Edvokesi Forum (ICRAF) i salensim dispela disisen bilong lain manmeri bilong Minz long Nesenel Kot long rausim nagivim fridom i go long Miriam bai em i painim wanpela man long laik bilong em yet.

Jas Injia i kaunim olgeta ripot na evidens long bihainim kastom na ol arapela lo olsem bai ol i no inap pusim Miriam long maritim wanpela man em i no laikim long en.

Jas Injia i tok nogat man bai pusim Miriam o ol narapela meri insait long Minj eria long

maritim ol man olsem kompensesen peme o ol pipel i pusim ol long maritim bihainim kompensesen pasin. Bikos bikpela lo i stap pinis long lukautimna banisim olgeta manmeri long laik bilong wanwan long makim laik bilong ol yet.

Jas Injia i tokim ol Tangilla na Komumbuka haus lain long stap longwe long Miriam na no ken askim o yusim pret toktok long em long bagarapim gutpela sindaun bilong Miriam.

Jas Injia i tok Miriam i mas i stap olsem wanpela fri meri aninit long olgeta fridom na luksave bilong mama lo bilong PNG we i givim long olgeta wanwan manmeri.

## Tripela lida lusim Somare long Is Sepik

TRIPLELA strongpela sapat bilong Sir Michael Somare long Is Sepik Rijenal sit i lusim pinis grup bilong Somare na joinim Joe Gawi, warapela kendidet bilong dispela rijenal sit.

Ol i tok olsem planti ol arapela lida long narapela hap bilong provins i tok aut pinis olsem ol tu bai lusim grup bilong Somare long wanem ol sevis na promis we em i tok em bai wokim i no kamap.

Ol lida ya em long presiden bilong Drekkir kaunsol John Lambaik, presiden bipo long provinsal Pangu Pati Joseph Lekemani na John Malken presiden bilong Wosera-Gawi lokol gavman kaunsol.

Tripela man i tokaut olsem ol i kamap long dispela disisen long wanem ol i wok long wet long kism developmen long ples bilong ol longpela taim tru na ol i laik bihainim wanpela man husat bai bringim sevis i kam long ol.

Tripela man i tok tu olsem ol pipel bilong ol i putim toktok long skin bilong ol olsem ol i wok long kism taim long ol rot, skul, haus sik na gavman sevis olsem na ol i mekim dispela disisen.

"Mipela i wok long wet insait 28 yia, we mipela i no lukim wanpela liklik senis.

"Ol napa bilong mipela i sapatim Pangu i kam inap longpela taim na ol i : Jai tasol ol i no lukim wanpela kaikai bilong dispela sapat," John Malken i tok.

Em i tok Pangu wantaim Somare i bin stat long Is Sepik we olgeta pipel i sapatim dispela pati i kam inap nau tasol nogat wanpela helpim i kam insait long dispela ol yia.

Presiden bipo bilong Pangu Pati long provins Joseph Lekemani i tokaut tu olsem em i les pinis long lukim olsem ol pipel bilong Is Sepik i kism nem nating na i nogat gupela sevis i kamap ong peles bilong ol.

Em i tok olsem olgeta taim bilong ileksen ol Is Sepik pipel i save votim bek Somare long kam bek long palamen tasol Sir Michael i no save soim amamas bilong em long bringim ol sampela bikpela senis long provins.

"Insait long 28 yia mipela i bin stap olsem ol laplap bilong ol windua na nau em i taim olsem mipela ol pipel i mas kirap na makim ol nupela lida long kirapim sampela senis long provins.

"Mipela long Is Sepik i mas go fowet tasol i luk olsem biknem em mipela i kism nating tasol," em i tok.

Narapela strongpela lida bilong Wewak lokol Moses Nelson tu i tok olsem em i no save wanem bikpela samting i kamap long Wewak long ol yia i go pinis.

Em i tok olsem em i no save long wanem i no bin gat wanpela bikpela senis i bin kamap long Wewak, taim ol arapela eria bilong kantri i wok long go het na Is Sepik i wok long go bek yet.

"Taim mipela i tok inap, em inap, mipela i no laikim ol rot na taun bilong mipela i stap olsem taim bilong independens.

"Dispela ol senis i kamap long yia i go pinis na mipela i mas muv olsem ol arapela provins, wanem samting i rong wantaim mipela," em i tok.

Dispela tripela lida i tok olsem ol i harim komplek bilong ol pipel bilong ol i go na ol i sore nogut tru long wanem nogat wanpela samting long laik bilong ol i senis.

## Sandaun dipatmen i as bilong VTA i nogat moni

FELIX RAMRAM i raitim

VANIMO Taun Atoriti (VTA) i pasim opis bilong em long mun Januari inap gavman wantaim Dipatmen bilong Sandaun i givim moni i go long ol. Na tu Sandaun Dipatmen i mas bekim dinau moni em i kism long Vanimo Taun Atoriti. Dinau moni inap olsem K16,917.50 we i bringim baset deligesen bilong Sandaun i go long Mosbi.

Menesa bilong Vanimo Taun Atoriti Joe Aflatawa i tokaut olsem em i mas stapim ol wokman bilong Atoriti long mekim wok tu. Bikos VTA i nogat moni long baim potnait pe bilong 20 wokmanmeri bilong em.

Em i tok stopim bilong ol dispela wokman i min olsem ol sevis em VTA i save givim i go long Vanimo taun komyuniti tu i bai stop.

"Mi sori tru dispela samting i kamap long yumi. Wok bilong taun sevis olsem long rausim ol baket, klinim ol barek na katim ol gras bai i no inap moa go het na ples bai i bagarap tru. Ol mesin bilong Atoriti tu bai i no inap wok, olsem bikpela ka na ol lom-mowa. Ol tu i mas gat bensis na wel long wok, na nau mipela i nogat moni, ol dispela mesin tu bai i no inap wok," Mista Aflatawa i tokaut.

Taun Menesa i tokaut tu olsem moa long tupela potnait stat long 28 Januari, ol wokman bilong VTA i kism tasol hap potnait pe bilong ol na dispela i no gupela.

Mista Aflatawa tu i sutim pinga long opis bilong Provinsal Tresera na i tok opis ya tu i no mekim gut wok bilong en. Long lukim olsem olgeta moni aninit long Taun Sevis Gren na Lokel Level Gavman Gren bilong '96 opis bilong em i givim i go

long Vanimo Taun Atoriti.

"Aninit long Taun Sevis Gren Treseri Opis i no givim mipela yet. Lokol Level Gavman Gren moni tu i no kam yet, maski ol i givim sampela pinis. Dispela i no bin inap long helpim long karimaut olgeta wok bilong mipela. Ful moni treseri i mas givim i sanap long K120,000 aninit long Sandaun Provinsal baset bilong 1996. Tasol ol i givim K83,439 taim K37,561 i hangamap i stap yet.

Sapos dispela hap moni ya i bin kam insait bai mipela i ken go het yet long givim aut ol sevis, em i tok.

"Na moa long K16,000 Sandaun Dipatmen i bin dinau long VTA las yia. Moni ya i Dipatmen i kism wantaim tingting bilong bekim bek. Tasol i kam inap nau dispela moni i no kam yet long Vanimo Taun Atoriti," Mista Aflatawa i tokaut.

Taun menesa i askim strong dipatmen wantaim treseri opis long lukim olsem moni we i mas go long Vanimo Taun Atoriti i mas givim hariap. Long helpim Atoriti taim tokorait bilong Provinsal baset bilong dispela yia i no kamaut yet.

Singaut tu i go long wanwan manmeri, ol bisnis haus na kampani. Sapos ol i no baim yet moni bilong rausim ol pipia na baket bilong ol ol i mas kamap long opis bilong Taun Menesa na baim hariap moni bilong ol.

Mista Aflatawa i tokaut tu olsem dispela taim bai opis bilong em i lukim olsem ol wokman i rausim tasol ol pipia na baket. Long ol lain husat i baim dinau bilong ol. Em i tok sevis long dispela taim Atoriti i givim tasol long ol lain olsem VFP, PNGDF na CIS. Bikos ol dispela lain i save baim opis bilong em long sevis Atoriti i givim long ol olgeta taim.

# WANTOK

NIUSPEPA BILONG OL PNG STRET

P O Box 1982 BOROKO  
Telepon namba: 3252500  
Feks namba: 3252579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika ha Yurop	K180.00

# TORO

TORO WOK LONG CITY KAUNSO... EM MAN BILONG RIDIM MITA BILONG WARA...  
\* MITA-RIDA..

WANPELA TAIM OL BOSS ISALIM EM LONG GO RITIM MITA LONG TOKARARA...

TORO, GO RIDIM MITA LONG TOKARARA ERIA.



EM I GO KAMAP LONG FES HAUS NA RITIM MITA I STAP...



ONA BILONG HAUS IKAMAU NA SINGAUT IGO LONGI TORO...



EM GO BEK INSAIT NA KISM TAMIOK NA RON IKAMAU...



# Watut lida i no amamas long ol maining kampani

## ARI GUH DANDEE i raitim

KOMYUNITI lida bilong ples Erava Krik, insait long Watut Morobe provins, Peter Moses i askim papagraun bilong Watut long lukluk gut na sekim ol liklik maining kampani husat i wok long painim gol insait long wara Watut.

Mista Moses i kamapim dispela askim bikos ol papa graun i bin tok oraitim ol dispela kampani long i go insait long mekim wok. Tasol ol

dispela kampani i no save traim long helpim ol komyuniti long Watut wantaim sampela komyuniti servis na dispela i no gutpela tumas.

Em i tok, rot i stat long Sosaiti i go long Yokua i no gutpela tumas. Na ol dispela kampani i mas stretim pastaim na lukluk long mekim wok bikos ol pipel save yusim dispela rot, skul long Yokua i nidim ol sampela moa skul samting, na ol dispela kampani mas lukluk long helpim edpos insait long dispela

hap tu. Edpos ya i sot long ol kain helpim olsem mentenens na marasin na em i wok bilong ol dispela kampani long lukluk na stretim.

Mista Moses i tok dispela em ol samting we ol pipel i nidim insait long komyuniti ol i stap long en olsem na ol papagraun i mas lukluk gut na toktok wantaim ol dispela kampani long stretim gut sindaun bilong ol komyuniti pastaim na bihain lukluk long kisim moni bilong graun.

Nao yet i gat 6-pela kampani nao i wok long wok bihainim wara Watut stat long Sosaiti i go antap long Yokua viles. Na dispela i bikpela eria tumas tasol, dispela ol kampani ya i no tingting long kamapim sampela komyuniti servis bilong helpim ol pipel bilong Watut.

Long tingting bilong Mista Peter Moses em i laikim olsem Maining Dipatmen i mas lukluk tu i go insait long dispela askim bilong en na sekim tu wantaim long agrimen bilong ol dispela kampani wantaim

ol papagraun long wanem kain tok orait ol i kamapim namel long ol yet.

Dispela i no gutpela tumas bikos, ol kain kampani olsem i save giamanim ol pipel na bagaramim ol samting na bihain ol papagraun i save bungim hevi na i moa gutpela long ol papagraun mas lukluk na skelim gut ol toktok pastaim na bihain putim ol kampani long wok bihain tok orait bilong gavman.



CATHOLIC COMMISSION FOR JUSTICE, PEACE & DEVELOPMENT  
PO BOX 6576  
BOROKO, NCD  
PAPUA NEW GUINEA

### Redi long 1997 nesanel ileksen

10. Bai kantri i gat sans long lukim gutpela sindaun, sapos yumi votim ol gutpela lida i go long Nesanel Palamen.
11. Yumi ol vota is mas putim kantri i go pas long taim yumi votim ol mida.
12. Yumi mas skelim gut pasin bilong ol kendidet. Yumi mas skelim llaip bilong ol kendidet na i ken skelim tasol ol mauswara bilong em.
13. Yumi mas skelim ol promis bilong kendidet na lukim sapos dispela promis bai inap karim kaikai o nogat.
14. Yumi mas lukim sapos kendidet i yusim mani long baim ol vot. No ken harim gris na salim vot bilong yu.
15. Yumi mas strong na tok nogat long kendidet husat i raun long baim vot.

# Helpim komyuniti program stat long Gerehu

## EDDIE SAUNDERS i raitim

MOA long 300 yut na mama-papa i bung long Gerehu las wik long opim Strit Rihebilitesen Program. Ministri bilong CIS i givim K400. long helpim dispela program.

Na insait long dispela bung ol yut i bin stap insait long Vadavada birua tu i kamap. Na planti ol bikhet na trabel manki i bin kamap tu. John Harangu papa bilong Arnold Harangu, yangpela boi husat i bin dai long gan pait namel long polis i makim CIS ministri na givim K400 long ol Khaputs Yuts Faundesin long dispela bung long Gerehu.

Dispela moni CIS ministri i bin promis long givim long ol yut long Stet 5 long Septemba 1996. Ol Gerehu Stet 5 i bin mekim rekot long siti long kamap namba wan lain long holim komyuniti so insait long Mosbi siti.

Siaman bilong Khaputs Yut Grup na Faundesin, Victor Soni na presiden bilong Nesanel Yut Federesen Steven Warapen i bungim tok na tok dispela program i narakain long olgeta. Bikos ol manki yet bilong strit i statim. Ol arapela rihabilitesen program em ol misinari na gavman i save ronim. Na gavman

tu i save givim moni long ol. Tasol ol Khaputs yut, ol yet i traim long wokim na pulim moni bilong ronim program bilong ol.

Dispela em samting planti ol yut grup i no mekim yet. Planti save askim long moni i kam long gavman tasol Steven na Victor i tok. Tupela i tok gavman, memba bilong palamen, ol kampani na bisnisan na meri i mas luksave long dispela kain yut grup husat i laik mekim wok na sapotim ol.

Tupela i askim ol bikpela save manmeri i gat bikpela wok na moni tu long sapotim ol kain tingting bilong ol yut husat i traim long helpim ol yet. Mipela i bilip nau long dispela rot na pasin i gutpela we long daunim raskol pasin. Bikos sapos olgeta komyuniti sapotim yangpela eria na ples bilong ol yet bai lo na oda problem i go daun. Sapos yumi olgeta i wok bung wantaim bai i nogat raskol pasin i stap. Na ol manki bai i no laik painim moni long stil pasin, tupela lida ya i tok.

Tupela i tok tu olsem rihabilitesin program

bilong ol Khaputs yut i no bilong ol yut man na meri tasol. Ol mamapapa tu bai stap insait. Kisim skul na givim skul tu. Program bai bungim olgeta insait long komyuniti. Na olgeta bai kisim kaikai bilong ol skul insait long ol semina na woksop. Ol i stat long givim sampela skul long ol manki long 10 Februari.


Insait long woksop ol i lainim long mekim wok na ol samting long ol yet. Soni na Warapen i tok i tok ol manki i ken i gat nem nogut. Tasol ol i ken kamapim gutpela nem tu long mekim sampela gutpela samting bilong helpim komyuniti. Ol tupela i mekim bikpela toktok amamas i go long CIS ministri long helpim dispela program wantaim K400.

Ol i gat 8-pela grup bilong kamapim Faundesin. Na dis-

pela 8-pela grup bai yusim moni long pulim moa moni na sapotim wok bilong ol yet long helpim Faundesin na program. Ol grup i gat ol spot klap nau. Na ol i fomim wanpela ragbi kompetisen pinis insait long Stet 5. Ol sampela manki Stet 6 tu i stap insait long dispela. Na ol meri tu bai kamapim pilai bilong ol meri olsem netbal na baskebal.

Ol yut lida i bilip olsem em wanpela samting long bringim komyuniti i bung wantaim na stap bel isi wantaim. Bikos Gerehu Stet 5 i bin holim wanpela komyuniti yut so las yia long 10 Septemba. Na bihain long dispela so komyuniti i no stap wanbel wantaim tumas. Na dispela program bai i bringim ol gen long stap bung wantaim, ol yut i pasim tok olsem.

## Ol ami kisim skul long drag



### • Ol ami na Bureu opisa kisim skul long hevi bilong smok nogut olsem mariwana na ol drag.

NESENEL Nakotiks Bureu i skulim 25 PNG ami na 8-pela opisa bilong em long Drag Awenes long stat bilong mun Februari. Ol ami na 8-pela opisa i kisim dispela skul long hevi bilong spak brus na arapela drag nabaut na ol hevi bilong ol.

Dispela kos bai mekim klia long ol wanem hevi em spak brus na ol kain drag i kamapim na ol eria we lo i tambuim ol drag long en. Dispela kos tu bai skulim ol soldia long hevi bilong drag insait long wol na mekim klia long ol long wanem kain rot na pasin em Papua Niugini na intenesenel komyuniti i wok long mekim long daunim hevi bilong drag.

Dispela kos i pusim moa long planti lain i mas kisim dispela trening na skul. Ol lain soldia na opisa husat i sindaun long dispela kos i yusim ol spesel buk bilong rait long en we Bureu i wokim.

Long tumoro bai Komanda bilong ami, Bridegia Jerry Singirok i pasim dispela woksop na givim setifiket

long ol dispela lain ami na opisa.

Long dispela yia bai Bureu i kamapim 11-pela awenes kos na tupela kos long rot bilong lukautim gut na helpim ol lain husat i save kisim spak brus na drag long komyuniti. Ol bai lainim rot na pasin bilong stretim ol dispela kain sikman long pasin bilong ples na komyuniti yet.

I gat arapela kos we i sut tu long skulim ol manmeri long arapela hevi bilong spak brus na ol kain drag nabaut. Na ol i sut long ol spesel grup.

Nupela kos i op nau na ol manmeri husat i laik sindaun long dispela woksop i ken toktok wantaim; Mr Mathew Nelson, Assistant Director Training Centre, National Narcotics Bureau, PO Box 3880, Boroko, NCD. O ol i ken ritim em long telepon namba 325-0910/325-0691 o salim Fax long 325-8842.

Fi bilong kos em K60. long yusim buk na moning ti na apinun kopi.

BIAS BAKSAIT TIT BILONG BIABIA I PEN NA BAGA KISIM TAIM STRET LONG NAIT...



NEKS DE EM GO LUKIM OL DENTIST LONG RAUSIM TIT...



OL DENTIST TOKIM EM LONG SINDAUN NA BAI OL I RAUSIM TIT BILONG EM...



TAIM DENTIST I LAIK PUTIM NIL LONG MAUS BILONG BIABIA, EM BIKMAUS NATING...



# Sampela belpen namel long ol Pangu kendidet

I gat moa hevi i kamap nau insait long Pangu Pati bihain long pati i tokaut long ol kendidet bilong en long 1997 ileksen.

Wanpela mausman bilong pati i tokaut olsem sapos ol lida i no stretim dispela hevi bai inap long bagarapim sans bilong Pangu long Is Nu Briten na Nu Ailan.

Long Kavieng, Chris Haiveta na Sir Michael Somare i putim nem bilong lan Ling Stuckey olsem kendidet bilong pati. Orait Ling-Stuckey i mas tokaut nau sapos em bai go wantaim lain bilong Haiveta o Somare. Sapos pati i no stretim dispela hariap, bai inap long helpim sans bilong memba bilong Kavieng Ben Micah.

Bikpela bung bilong Pangu Pati long Kerema las wik i bin makim olsem primia bilong Nu Ailan Pedi

Anis long resis long rijonal sit em Paul Tohian i holim nau. Pangu memba Ezekiel Waisale i no amams long dispela bikos em tu i resis long dispela sit. Bikos long dispela, Waisale nau bai i bihainim pati bilong Somare.

Long Is Nu Briten, Pangu i tokaut olsem kendidet bilong ol em Ephraim Jubilee Jr husat bai salensim John Kaputin long sia bilong Rabaul Open.

Dispela mausman i tok Sir Rabbie Namaliu i no amamas long dispela.

Pangu i no takaut yet long kendidet bilong ol long salensim Francis Koimanrea long sia bilong Is Nu Briten Rijonal. Tasol pati i sapatim yet memba bilong Gasel Nakikus Konga.

Bai pati i tokaut bihain long nem bilong ol kendidet bilong en long Papua na Hailans rijon.


# Somare i tok em i stap yet wantaim Pangu

PAPA bilong Pangu Pati, Sir Michael Somare i tok maski sapos Pangu Pati i rausim em, bai em i stap yet wantaim dispela pati em i bin go pas long kamapim. Sir Michael i tok olsem bihain long bikpela bung bilong Pangu long Kerema i rausim em long Pati.

Ol lida bilong Pangu i bin bung long Kerema las wiken we ol i makim ol kendidet bilong pati long 1997 ileksen. Ol i tokaut olsem Somare i no moa memba bilong Pangu. Na ol i makim Tobias Kwelik long resis wantaim Somare long sia bilong Is Sepik rijonal long ileksen.

Somare i tok em i sori long harim olsem Pangu i rausim nem bilong em long pati. Tasol em i tok em i no inap long lusim pati em i bin kirapim.

Em i tok taim em i step daun olsem lida bilong pati, em i mekim olsem long givim sans long Haiveta i kamap lida. Em i tok dispela i bihain tingting bilong Pangu olsem ol i mas larim wanpela man Papua i go pas long Pangu.



• Sir Michael Somare.



• Sir Julius Chan.

Somare i tok Pangu i stap long gavman tasol Sir Julius Chan i wok long yusim tasol pati. Em i tok planti ol disisen nau gavman i kamapim i no bihainim asting ting bilong Pangu Pati.

Em i tok planti sapota bilong Pangu i no wanbel long Pangu i vot wantaim gavman long mekim senis long provinsal gavman. Somare i tok eksekutiv bilong

Pangu i no bin sapatim aida bilong senis, tasol Pangu i gohet na vot wantaim gavman long senisim lo.

"Nem bilong Pangu i no klin moa. Em i gat nem long senisim lo bilong provinsal gavman.

Sir Michael i tok tu olsem Pangu i no gat strong moa bikos ol lida bilong pati nau i no sanap bung wataim.

## Pangu i tokaut long ol kendidet bilong en

Pangu Pati i mekim bikpela bung bilong em long ples Uritai las wik na ol i makim olgeta memba long resis gen aninit long tiket bilong pati. Tupela sit tasol bai i senis. Lukas Waka memba bilong Wes Nu Briten i risain nau na pati i rausim nem bilong Somare.


Hia em nem bilong ol kendidet bilong Pangu;

Brown Bai (Wes Nu Briten), Chris Haiveta (Gulf), Sir Thomas Koraea (Kerema), Tony Ila (Kikori), John Giheno ( Henganofi), Moi Avei (Kairuku Hiri), Nakikus Konga (Gasel), Sir Rabbie Namaliu (Kokopo), Sir Pita Lus (Maprik) Judah Akesim (Ambunti-Drekikir), Samson Napo (Bulolo), Robet Nagle (Mul Baiyer), Kilroy Genia (Abau), Bob Bubec (Not Flai), Chris Sambre (Nuku), Camilo Essef (Goilala), Napopotti Buru (Vanimo Green), Daniel Tulapi (Kagua Erave), Mathew Yago (Tari), Arnold Marsipal (Manus), Dr Philip Basse (Bogia), Nick Yara (Midel Ramu), Samson Kuli (Usino Bundi), Henry Kubug (Sumkar), Wesley Sanarup (Madang Open) Samuel Pariwa (Rai Kos), Tobias Kwelik (East Sepik), Joe Kerui (Angoram), Charlie Wati (Yangoru/Sausia), Michael Kasi (Wewak) na William Bakam (Wosera/Gawi), Jerry Nalau (Morobe), Royden Aigal (Tewi Siasi) John Marang (Markham), Pedi Anis (Nu Ailan).

Bai Pangu Pati i tokaut long nem bilong ol kendidet bilong ol ilektoret long hap bilong Papua, Hailans na Niugini Ailan bihain long ol dispela rijon i mekim liklik bung bilong ol long glasim ol kendidet.



• ANTAP: Lida bilong Pangu Chris Haiveta wantaim ol arapela Pangu memba i bungim ol pipel bilong ples Uritai . . . ANINIT: Lapun Sir Pita Lus na Chris Haiveta i sekhan wantaim ol biklain long ples Uritai.



# Madang i no amamas long ol kendidet

Madang brens bilong Pangu Pati i no amamas long nem bilong ol kendidet bilong Madang em pati i tokaut long en.

Insait long bung bilong Pangu Pati long ples Uritai long Galp provins, ol i bin tokaut long nem bilong ol kendidet em pati bai sapatim long 1997 ileksen.

Ol kendidet bilong Madang em hia; Dr Philip Basse - Bogia; Nick Yara-Midel Ramu; Samson Kuli - Usino Bundi; Henry Kubug - Sumkar na Wesley Sanarup - Madang Open.

Presiden bilong Madang distrik, Augustine Wingiap na vais presiden Donben Tauja i tok ol eksekutiv bilong Pangu i no bihainim stret pasin bilong makim ol kendidet. Ol i tok stretpela pasin bilong makim kendidet i olsem, ol distrik i mas makim kendidet na givim nem i go long nesanel eksekutiv long glasim na givim tok orait.

Tupela lida i tok ol i no bin givim nem bilong Wesley Sanarup ol narapela kendidet em Pangu i tok bai makim pati long Madang.

Tupela i tok ol i bin makim ol narapela kendidet long ol sit long Madang na ol i kirap nogut long harim nius.

## TU MINIT TINGTING

## Ol lang i save skulim yumi

Mi sindaun i stap long rum bilong mi na wanpela lang i kam insait. Em i flai nabaut. Na em i sindaun long laik bilong em. Na em i kirap gen long laik bilong em. Em i painim sampela liklik hap kaikai na i karim i go. Mi lukim lang ya na mi tingting planti.

Dispela liklik lang em i wanpela spesel samting. Em i olsem wanpela liklik balus, tasol em inap mekim planti samting balus i no inap mekim. Lang i no save pundaun na painim bagarap olsem balus. Lang i no nidim wanpela ples balus bilong tek op. Em i hetwin tasol i kam daun olsem heli-copta stret. Lang i no save painim birua; em i no save bamim wanpela samting. Lang i no mas skul long kamap pailot. Ensin bilong lang i no save bagarap. Em i no save sot long bensin. Na lang em inap kamapim wanpela nupela lang.

Olgeta kompyuta wantaim i no inap long wanpela lang. Na ol lang i kamap we? Husat i wokim ol? Em God tasol. Lang em i wanpela eksampel tasol bilong save bilong God, em dispela save em i bin haitim insait long ol enimal na diwai na sayor na binatang na wara i stap nabaut long yumi.

Nogut yu longlong na yu ting ol dispela samting i bin kamap nating. Nogat tru. God yet i bin wokim ol.

Orait nau yumi lukim sampela moa eksampel bilong save bilong God i stap nabaut long yumi. Husat i skulim ol pisin long wokim spesel kain haus bilong ol? Husat i trenim liklik pusi long karamapim pekpek bilong em? Husat i skulim pikinini pato long brukim kiau na kam na wantu em i go swim long wara? Tasol ol liklik pikinini paul i kamaut long kiau, ol i stap longwe long wara.

Sapos yumi go bek na lukim ol lang, yumi painimaut olsem: sapos sampela kaikai i stap ples klia inap liklik taim tasol, wantu ol lang bai smelim na kamap. Na bai ol i tokim ol wantok tu. Na olsem wanem ol i save toktok?

Long sampela kantri ol lang i gat namba na ol pipel i gat wanpela Flai God i save lukautim ol.

Tasol nogut ol lang i karamapim graun olgeta, olsem na God i bin wokim tu wanpela spesel kain

pisin i save kaikai ol lang tasol. Sapos yumi lukluk nabaut, bai yumi inap painim planti arapela eksampel bilong soim pawa na save bilong God. Ai bilong yu i soim pawa bilong God. Yumi inap lukim wanpela bikpela haus o bikpela gaden o bikpela tri na wokim wantu wanpela kala poto long ol. Yumi no mas go long kemis bai em i wasim poto. Na olsem wanem na ol musik na toktok i bin maunten na gaden i ken i go insait long liklik ai bilong yumi? Em pawa bilong God tasol i mekim.

Orait, nau yumi lukim narapela eksampel bilong pawa bilong God. Yu opim nau redio o kaset masin bilong yu, o yu putim yau long singsing bilong ol pisin. Olsem wanem na ol musik na toktok i bin kamap long yau bilong yu? I nogat waia olsem telipon. Ol toktok na musik ya i flai tasol long win na i kam.....na yu inap lukim.

I gat planti samting yumi no klia long en tasol God i save pinis. Ating yu save olsem: hat bilong yu i save pairap inap long 100,000 (wan handret tausen) taim long


wanpela de? Na em i no save les; em i no save stop; yu no mas welim masin bilong en.

Na blut bilong yu i save ran insait long planti kilomita rop insait long bodi na bringim kaikai i go long olgeta hap bilong bodi.

Planti tausen tingting na aidia i save stap insait long kru bilong yu, tasol ol i no kisim spes. Het bilong yu i no pas. Olsem wanem?

Dispela skin i karamapim bodi bilong yu olgeta em yet i save fiksim bek olgeta liklik sua, na olgeta sevenpela .yia bodi i gat nupela skin olgeta.

Yumi lukim ol dispela kain samting na yumi mas tokaut olsem: husat i bin wokim ol dispela kain samting, em i mas wanpela save-man tru. Yesa, i tru. Yumi save kolim em God. Na tu, em i papa bilong yumi. Tasol nogut yumi ting em i stap longwe antap long ol klaut na sta. Nogat. Yumi lukim pawa bilong em i stap insait long olgeta samting i stap nabaut long yumi na i gat laip. Long wanem, God wanpela tasol em inap wokim




FRANK MIHALIC i raitim

laip. Long Stori bilong ol Aposel (17:28) i gat dispela hap tok: "Yumi save kisim laip long em na em wanpela tasol i givim strong long yumi na yumi save wok-abaut."

Dispela bikpela saveman God em i papa bilong yumi tu; em i gat interes long yumi. Na yumi olsem wanem? Yumi gat interes long em tu, laka? Yumi mas opim ai tasol na lukluk nabaut long yumi na painim em long planti samting. Olgeta samting yumi harim na lukim i mas stiaim yumi i go long God.

Olsem tasol na yumi bin stat wantaim lang na yumi bin painim God.



• Ol memba bilong Gospel Laip Autris Traveling Ministri bihain long ol i statim wokabaut lusim Daulo Pasi kam daun long Goroka.

# Manus skul laik kamapim rilisen klas

FELIX RAMRAM i raitim

SAPOS ol wok redi i ron gut, i no longtaim bai Manus provins i kamap namba wan provins long mekim rilisen (RI) i kamap olsem wanpela subjek olgeta skul i mas kisim. Olgeta hai skul bilong provins tu bai i mas gat ol saplin o pater na pasto i save stap oltaim long ol.

Siaman bilong Edukesen na Yumen Developmen Komiti bilong Manus, Mista Michael Kumeh i mekim dispela toktok bihainim ol toktok pait long ol i no laikim ol studen bilong ol arapela sios husat i wok long skul long Papitalai top-ap Sekenderi SKul i pusim ol long lainim na bihainim Lotu Katolik.

Bikman ya i tok sapos Komiti em i go pas long en i tok orait long tingting bilong em, bai divisen bilong Edukesen i go het long kamapim ol wok redi biong lukim

olsem rilisen tu i kamap olsem wanpela sabjek i stap namel long ol narapela sabjek bilong ol skul insait long provins.

Em i go het na tok dispela bai i karamapim olgeta komyuniti, vokesenel na hai skul. "Dispela bai i bihainim Edukesen Polisi bilong 'Moral and Etiks' bilong lainim tok bilong God", Michael Kuweh i tok.

Komiti ya i tok strongim bilong dispela tingting i sanap olsem, namba wan divisen bai i skelim gen polisi ya na lukim olsem olgeta skul bai i kam aninit long en. Namba tu em long pulim i go insait Sios Kaunsel na mekim em i kamap olsem bodi we bai i kamapim program. Na bai i gat ol saplin pater/pasto husat bai stap olgeta taim long skul. Long gutpela bilong olgeta studen long lainim long tok bilong God.

Michael Kuweh i tok: "Tru toktok i wok

long sut i go kam nau long Papitalai Hai Skul na Ecom. Tasol yumi tu i mas tingim planti ol pikinini bilong yumi i stap long ol hai skul olsem Bundrahi na Manus Hai Skul. Husat long ol i mas lainim tu tok bilong God. Mi no laik bai yumi lusim tingting long ol narapela hai skul na lukluk na toktok long wanpela o tupela skul tasol, komti i tok.

"Mi gat strongpela bilip Sios Kaunsel bai i givim mipela sapat na papamama bai helpim wantaim na tu Edukesen Divisen. Olsem bai yumi lukim gutpela rot long bihainim long kamapim sprituel developmen insait long olgeta hai skul. Bikos laik bilong God na toktok bilong God i bilong yumi olgeta."

Edukesen na Yumen Developmen Komiti siaman i askim olgeta papamama long sapatim dispela tingting. Long gutpela bilong Manus pipel long bihainim taim.

## Madang daiosis pinisim wan wik Evenjalisim kos

PAULUS TALI i raitim

MOA long 36 sios lida long olgeta daiosis bilong Katolik sios long Madang i kamap long holim wanpela wan wik kos long ples Megiar long Not kos, rot Madang provins las mun.

Wanpela sios lida bilong Pangpang sab paris long Saidor Madang Mista Gabriel Manim i tok mipela ol 36 lain i makim pes bilong ol paris i kam long wanwan peris na amamas tru long dispela kos. Em i helpim mipela tru long wok bilong mipela. Bikpela toktok o het tok bilong dispela kos we ol sios lida kamap kisim em 'Diwai kros em i win pinis'.

Sios lida Manim i tok dispela het tok em i sut long tok Pop Jon Paul 2, i makim dispela yia 1997, em yia tru bilong Jisas na em i win, em karim olgeta hevi, na asua bilong yumi antap long dispela diwai kros, Manim tok.

Tripela pater husat i go pas long ronim dispela kos em pater Joe Fosna, Madang taun, HoliSpirit peris pris, Gregory Kiane Yika jenerel na Jack Peris Pris bilong Megiae not/kos Madang.

Ol pris i givim kos long ol 36 sios lida ya i tok strong olsem yupela mas save Jisas i win pinis. Em i winim pawa bilong man nogut satan olsem yupela ol lidaman bilong peris mas go bek long asples na autim tru tok bilong Diwai kros em i win.

Long dispela rot yupela inap helpim ol lus sipsip na ol bai save gut long tok tru bilong diwai kros, em i wanem samting.

Sios lida Manini i tok long kos ol makim dei bilong olgeta kristen long Madang daiosis bai wok-abaut karim diwai kros na wokabaut stat long 11,12,13 na 14 Septemba. Dispela wokabaut bai stat long ples Damp Not/kos, rot go antap long Maria, helpim maunten na sanapim krusei.

Manini tok em bikpela de bilong Katolik sios long Madang bai bihainim.

Em tok dispela taim tu bai i gat mesa antap long maunten ol bai sanapim krusei long en long soim olsem dispela yia 1997 pawa bilong Jisas i win pinis.

Tu ol kristen katolik peris long Bogia tu bai mekim wankain wokabaut stat long 11,12,13 Septemba long Bogia stesen go sanapim krusei long Holi Spirit maunten. Dispela tu bai kamap long makim olsem, Jisas em i win pinis.

Ol sios lidaman bilong wanwan peris amamas tru long kos ol i bin sindaun long en na bai ol i go aut autim tok bilong diwai kros long strongim ol kristen.

# Madang provins stretim moa rot bilong turis

**WATSON GABANA i raitim**

MADANG visitas na Kalsa Bireu (MV&CB) nau i gat nupela mep bilong soim husat manmeri i laik go long Madang long namba wan taim.

Bod siaman bilong MV&CB, Mista Cameron Carseldine i tokim ol lain husat i bin kamap olsem dispela i gutpela tru bikos em bai soim ples klia wanem hap ol nupela manmeri long

Madang i laik i go long en. Mista Carseldine i bin tok: "Dispea hap i no bilong helpim ol manmeri bilong arapela hap tasol, nogat, em bilong yumi wanwan na ol wantok na bisnis manmeri bilong Madang tu."

Mista Carseldine i bin tok tu olsem Madang visitas mep em i wanpela nupela samting tru long PNG. Narapela provins nau i ken mekim bilong ol yet. Em i tok Lae siti i redi tasol long mekim nupela visitas mep bilong ol.

In view design agency i bin

droim na redim piksa na Bolton Print long Kens, Australia i printim dispela mep. Dispela olgeta samting i kos olsem K20,000. Turism Promosen Atoriti (TPA) i bin helpim long givim hap moni olsem 50 pesen long printim 50,000 kopi bilong dispela mep. Air Niugini balus kampani tu i bin helpim long karim olgeta samting long Kens na go long Madang.

Siaman bilong MV&CB i tok olsem dispela projek em wanpela bilong planti arapela projek MV&CB i gat long

mekim. Sampela nupela samting olsem nupela ples bilong ol turis i ken i go long en, rekot buk bilong ol turis i kam long Madang na namba bilong wanwan singsing bilong Madang. Em i tok tu olsem ol i redi long kamapim nupela buk bilong pulim planti turis i kam long Madang.

Long dispela taim tu, Mista Carseldine i tokaut long nupela direkta bilong MV&CB, Mista Lukas Kawage. Mista Kawage i no bin i stap long dispela bung tasol em wanpela wokman

bilong Saut Pasifik Toas. Em bai stat wok sampela taim long neks mun.

Olpela Dairekta, Mista Alos Yagos i bin tok olsem em sori tru long lusim MV&CB long dispela kain gutpela taim, tasol em mas i go bikos em i gat sampela praivet samting long mekim.

Mista Yagos i bin tok; "aninit long lukaut bilong em, wok turis i bin ron gut tru. I bin i gat gutpela wok bung namel long gavman, TPA, MV&CB na ol Risos ona bilong ples".



### TOKSAVE

LONG dispela wik Fonde Februari 13, Ilektral Komisina Reuben Kaiulo bai stretim bikpela promis em i bin mekim long ol Ilekten wokman bilong em long Hailans.

Mista Kaiulo bai bungim Plis Komisina Bob Nenta na Komanda bilong Defens Fos, Brigidia Jeneral Jerry Singirok long Mosbi long dispela dei na stretim sekyuriti bilong ol Ilekten wokman bilong em long Hailans.

"Mipela i no inap lus tingting long yupela," Mista Kaiulo i tokim ol Ritening Opisa na Asisten Ritening Opisa bilong em long Hailans. "Mipela bai sapotim yupela," em i tok.

Mista Kaiulo i mekim dispela promis taim trening program bilong ol Ilekten opisa bilong Saten Hailans, Enga na Westen Hailans i pinis.

Mausman bilong ol dispela opisa, Joe Neng, ibin askim Mista Kaiulo long tokim ol plisman na defens fos long was gut long ol opisa bilong 1997 Ilekten na ol famili bilong ol.

Mista Neng em i asisten seketeri bilong provinsal na lokal gavman afeas long Westen Hailans. Em i tok, "Laip bilong mipela em i bikpela samting."

Em i tok olgeta opisa long Hailans rijon i bilip olsem sapos gavman i putim kefiu long Hailans long taim bilong Ilekten, bai 1997 Ilekten i ran gut.

Mista Kaiulo i tok long Mosbi long dispela wik Tunde olsem em bai bungim Komisina Nenta na Brigidia Jeneral Singirok long dispela wik Fonde long toktok long sekyuriti bilong ol wokman bilong Ilektral Komisina.

Em i tok dispela miting wantaim tupela bikman ya bai i toktok tu long olgeta wok sekyuriti long taim bilong Ilekten.

Mista Kaiulo i toktok tu long taim bilong pasim trening program long Hagen las wik na em i tokim ol opisa olsem, "Mipela i luksave long wanem trabel i bin kamap bipo.

"Em i wok bilong mipela long was long sindaun bilong yupela na sekyuriti bilong yupela wantaim famili tu na haus bilong yupela.

"Bai mi toktok wantaim Mista Nenta na Brigidia Jeneral Singirok taim mi bungim ol long Mosbi long Fonde. "Yupela em ol lain i go pas long mi na bai mipela i givim ful sapot long yupela."

Trening Program bilong 1997 Ilekten i bin stat long Mosbi tripela wik i go pinis long skulim ol opisa bilong Saten Rijon.

Namba tu program i bin kamap long Goroka long skulim ol opisa bilong Morobe, Simbu na Isten Hailans.

Program bilong Mamose Rijon i stat long Madang long dispela wik Monde Februari 10 na bai pinis long Sarere.

Las trening program bai kamap long Kimbe, Wes Nu Briten, na dispela program i bilong ol opisa long hap bilong Niugini Allan Rijon.

VOTE! GAT PAWA ENROL NA VOTE

## Ol kristen mas prea long God long sevim PNG

OL kristen sios insait long kantri i wari na prea bung wantaim nau long God i mas sevim PNG long ol sosal, politik na ikenomik hevi em i stap insait pinis na i luk olsem bai bagarapim kantri yet.

Na ol nidim sapot tu bilong olgeta kristen na pipel insait long PNG. Nau ol i putim lewa na tingting bilong ol long nesanel ileksten i mas gutpela. I mas nogat pait na dai. Ol sios i laikim yumi tu mas votim ol lida i pret long God na i bihainim gutpela kristen pasin, God i laikim yumi na ol lida i mas bihainim.

Na ol lida i hones na sevim ol pipel na long God tu. I gat tupela bikpela program i go on nau insait long kantri. Operesen brukim skru na yumi go we. Na yumi go we em ol Katolik Komisen bilong Jastis na Pis i go ronim.

Operesen brukim skru em wanpela bikpela ileksten awenes program olgeta kristen lotu karimaut insait long kantri. Prea na pasim bel bilong gutpela PNG. Ol sios lida i askim olgeta kristen manmeri long pasim bel na prea long dispela ileksten i mas wanpela ileksten i no gat hevi bilong kilim man i dai. I gat toktok pret i raun. Bai pait na kilim man bai kamap long dispela ileksten. Na ol kristen sios i wari na i laik bungim olgeta sios lida ol kristen manmeri long prea, toktok long ol pipel na soim long pasin bilong ol yet olsem dispela mas noken kamap.

Tasol i gat ol tok lukaut long sios

noken miksem politik wantaim lotu. Tasol Glasim Lewa na Tingting i bilip em wok bilong sios i mas mekim wok bilong em olsem gutpela profet i stiaim na helpim ol pipel kamaut long bikbus na hevi na lukim lait na amamas.

Na wanpela dispela toktok salens i kam long wanpela sumatin skul long politikel sains long yunivesiti las wik. Samuel Si-i wanpela honas politikel sains sumatin bilong Yunivesiti ov PNG long Mosbi i tok las wik Tunde, Februari 4, lotu wantaim politikis i no inap miks wantaim na kamapim gutpela sindaun bilong ol pipel.

Em i salensim sios na ol man i laik sanap long 1997 genral ileksten long no ken yusim nem bilong God nating. Sapos ol mekim olsem em ol daunim na bagarapim gutpela nem bilong God. Na em i bikpela sin tru long ai bilong God na sios tu long graun. Dispela sin ol kolim Blasfimi long tok English. Na dispela sin glasim lewa na tingting em save, i min olsem yu rabisim olgeta gutpela save na tingting bilong papa God.

Na lewa na tingting bilong God wari na krai. Mista Si-i i tok politik na lotu i no wankain. Sapos lotu na politik i bung wantaim bai tupela i belisi na laikim wanpela na arapela. Na tupela i no inap paitim toktok na skelim tingting long ronim kantri gut. Na pipel bai amamas. Si-i i no laikim tingting bilong Kristen Demokratik Pati.

**GLASIM LEWA na TINGTING wantaim Eddie Saunders**



Dispela em i tok i traime God. Na husat i laik sanap long lidim kantri long nem bikpela Jisas i mas i redi long givim em yet. Jisas i bin givim em yet long samting. Na em i dai. Yes, dispela salens bilong brafa Samuel Si-i i tru. Tasol olgeta sios, kristen lida na olgeta kristen i gat wok long stiaim politik i mas sevim tru ol pipel. Yu i no save. Dispela i mas singaut i kam long God yet long lotu i mas sanap strong long helpim PNG na pipel bilong em

Na sios i pilim ol i no ken sanap na lukim kantri na pipel i bagarap na lus. Glasim lewa na tingting sapotim sios na ol lida. Tasol askim olgeta kristen na sios lida sanap long wanpela na trupela sprit i kama long God tasol. Bikos God i lukim yumi. Na yumi i no inap hait long em. Na tok lukaut kendidet na sapota i kempen noken traim long winim God.

Glasim lewa na tingting i prea. Pait i mas noken kamap na kilim i mas no kamap. Mi bilip olsem kendidet tasol i ken stapim dispela birua. Glasim lewa na tingting i pasim lewa na tingting wantaim Katolik Komisen foa Jastis na Pis na Operesen Brukim Skru. Harim na yumi yet mas skelim tok lukaut bilong God insait long lewa na tingting bilong yumi wanwan.

## Stretim ol provinsal redio pastaim

OLSEM wanem? Ol pipel bilong Papua Niugini smel tinpis o? Mipela askim long skul. Ol i tok baim skul pastaim. Mipela laikim marasin ol i tok, baim pastaim. Mipela laikim kaikai na wara ol i tok baim pastaim. Mipela askim long moni long go hetim ol provinsal redio stesin ol i tok nogat moni.

Nau wanpela redio stesin bilong Australia i laik pas. Na yu ting wanem bai kamap nau? Praim Minista bilong mipela, Sir Julius Chan i tok, em i laikim Papua Niugini i mas givim K1 milion i go long Redio Australia. Oloman, Sir Julius em i Praim Minista bilong Australia o em i Praim Minista bilong Papua Niugini.

Na olsem wanem long ol provinsal redio stesin bilong mipela i pas longpela taim nau, i nogat wanpela gutpela redio sevis i go long ol pipel. Planti bilong ol dispela provinsal stesin i nogat gutpela haus bilong ol woklain. Na tu, planti masin bilong ol i lapun pinis na sampela i bagarapim olgeta.


Hamas lain bilong ol asples long Papua Niugini i save harim dispela sevis bilong redio Australia. Skelim dispela wantaim ol asples husat i save kisim ol sevis bilong ol provinsal redio. Ating sevis em ol provinsal redio i save givim long ol asples i winim dispela sevis em Redio Australia i save givim.

Sir Julius, givim dispela K1 milion long NBC na ol bai sevim gut ol asples Papua Niugini.

Las wik ol i rausim Joe Koroma olsem Siaman bilong Kopra Marketing Bot. Em i no bin stap longpela taim tru long dispela wok. Ating wan mum samting. Bilong wanem na ol i rausim Joe?

Agrikalsa Minista David Mai i bin makim Mista Koroma na bihain long wan mun em i rausim

**OPIM AI wantaim JOE KAU**



em. Mista Mai i tok olsem, planti groa i no amamas long Joe Koroma i stap olsem siaman.

Tasol bilong wanem na Mista Mai i makim Joe Koroma? Em i kisim rong edvais o em i no harim edvais? Dispela Minista i mas tokim mipela.

Sapos Mista Mai i kisim rong edvais, orait em i mas rausim olgeta edvaisa bilong em. Tasol sapos Mista Mai i no harim edvais, orait em i mas risain long wok bilong em

Mi no tok olsem em i rong bilong Mista Koroma, o Mista Koroma i no fit long wokim dispela wok olsem siaman. Em i rong bilong Mista Mai. Mista Mai em i no fit long wokim wok ministra.

Praim Minista i sakim tok bilong Mista Mai na Mista Mai i bihainim tasol. Sapos mi lida na Praim Minista i wokim dispela kain toktok long mi, em i soim olsem Praim Minista i nogat bilip long wok bilong mi. Olsem na i luk olsem Sir Julius i tok olsem Mista Mai i no fit long holim dispela wok ministra.

Mista Mai, sapos yu lida tru, ating moabeta yu risain long dispela wok ministra. Sapos yu holim yet dispela wok, em i soim olsem yu wanpela haus boi bilong Sir Julius Chan.

Dispela pasin bilong Mista Mai i bagarapim stret turangu nem bilong Mista Koroma. Sapos mi Mista Koroma bai mi kotim Mr Mai.

## JUST ARRIVED

### ROOK'S RADIO, IPI, 2ND ST.

P.O. BOX 191, LAE PH 472 4616 FAX 472 6281

Carlsbro, speakers, 100 watts, 150 watts,

100 watts - Mixer Amp, 4 channel, K 660.00

150 watts Mixer Amp, 6 channel, K1,045.00

200 watts Mixer Amp, 4 channel K 900.00

400 watts Mixer Amp, 6 channel K1,332.00

# NISSAN URVAN

# Em PMV Bus Bilong Yumi



**15 Seats, Bull Bar,  
Side Stripes,  
White Wheels  
and AM FM Radio**

**...all for only**

# **K24,500.00**

Plus on road costs

AVAILABLE NOW AT...



## **BOROKO MOTORS**

**THE GOOD GUYS FOR THE BEST BUYS**



PORT MORESBY: 325 5255 LAE: 472 1144 RABAUL: 982 8458 KIMBE: 983 5566 MADANG: 852 2433 MT. HAGEN: 542 1433 HIGATURU: 329 7175 TABUBIL: 548 9061

DANBURY BM0373



# Poto bilong Is Sepik



• Joe Gawi, wanpela kendideit bilong Is Sepik Riginol Sit i lap long dispela masalai man long ples Mamari. Mr Gawi i bin raun i go long dispela hap long halivim skul bilong ol.



• Ol yut bilong Paremba vilis long wara Sepik i singsing na tok welkam long ol visitas long opim bilong haus tambaran bilong ol.



• Ol meri long Yanget i sanap long tok welkam long visitas.



• Kon fleks bilong Wara Sepik . . . dispela em i no binatang nating, em i bilong kaikai. Ol pipel long Sepik Wara i save bungim na larim i drai pastaim na kaikai.



• Ripota Joe Kanakane i sindaun long bot na malolo long wanem dispela baret we bot i save ron, diwai i pasim. Dispela peles i stap namel long Masandanai vilis na Kaiwari.

*Ol poto - Joe Kanekane*

## Ganman kilim sikispela pipel

OL pipel long ples Raurimu long Nu Silan i wok long toktok yet long bikpela trabel i kamap long ples bilong ol long las wik Sarere. Wanpela man man i bin sutim sikispela pipel long gan.

Ol plisman i sasim Stephen Anderson bilong Wellington long sutim indai wanpela bilong ol dispela pipel, Hendrick Van de Wetering. Bai ol plis i sasim em long indai bilong ol narapela faivpela pipel tu.

Plis ripot i tok Anderson i gat 22 krismas na las yia ol dokta i tok em i gat sik long het bilong em.

Dispela trabel i kamap long taim famili bilong Anderson na ol pren bilong ol i bung long haus bilong ol. Stephen Anderson i kisim sotgan na sutim indai papa bilong em Neville Anderson. Orait em i sutim ol narapela manmeri tu na karim gan na wokabaut i go long haus bilong Van de Wetering na sutim em.

Plis ripot i tok Van Wetering i lukim Anderson i makim gan long pikinini bilong em na em i kalap i go long sevim pikinini bilong em na katres i kisim em.

Bihain long dispela trabel ol pipel long Nu Silan i wok long sutim tok i go kam nau long tambuim gan na tu long pasin bilong lukautim ol manmeri husat i gat sik long het.

Planti pipel i tok i no gat strongpela lo long stapim ol pipel i baim ol kain sotgan olsem em Anderson i yusim long kilim ol dispela pipel. Sampela i tok i no gat gutpela rot bilong lukautim ol manmeri husat i gat sik long het.

Ripot i tok tu olsem Nu Silan i wanpela kantri we i gat nem long man husat i gat sik long het i kisim gan na kilim planti manmeri. Olsem na gavman i mas skelim gut dispela na kamapim plen bilong daunim kain trabel olsem.

# Painim senis bilong Mother Teresa

**M**other Teresa, em i wanpela sista husat i gat nem long planti kantri long wol. Ol Katolik na narapela Kristen manmeri long wol i save gut long Mother Teresa na ol lain sista bilong em, ol Misineri ov Sariti.

Dispela lain Katolik sista i save lukautim ol tarangu manmeri na pikinini long hap bilong India. Nau ol i go mekim wankain wok tu long ol narapela kantri long wol. Ol dispela sista i kam wok hia tu long Papua Niugini.

Tude, ol bosmeri bilong Misineri ov Sariti i gat bikpela wok nau long makim nupela lida bilong ol. Bikos Mother Teresa i sik na i no gat moa strong long wok na i luk olsem taim bilong em long dai i klostu nau.

Mother Teresa i gat 86 krismas nau. Em i bin sik nogut tru las yia long mun Novemba taim em i painim bikpelasik tru long lewa bilong em. Em i orait nau tasol em i no gat strong moa na i save slip tasol.

Tude, i gat 5,000 ol sista bilong Misineri ov Sariti husat i wok long 120 kantri long wol.



• Mother Teresa i wok wantaim ol sik na rabis manmeri long India.

## Givim wok long ol kalabus

Gavman bilong Nu Silan i wok long traim sampela narakain rot bilong givim taim long ol manmeri husat i kalabus. Ol kalabus i no save sindaun tasol nau insait long haus kalabus, nogat. Wanpela rot ol i bihain nau em long salim ol i go wok long ol faktori na mani ol i kisim i mas go bek long famili bilong husat man i meri em ol i bin kamapim rong long en.

Tude i gat 4,900 kalabus i stap long 17 haus kalabus long Nu Silan. Ol i no save sindaun nating. Olgeta de ol i mas wok. Ol i mas wasim ol klos, samapim klos, groim kaikai long fam na mekim ol narapela wok bilong lukautim ol dispela 17 haus kalabus.

Ol kalabus i save mekim ol ausait wok tu. Ol i wokim ol tebol, sia na narapela samting bilong ol skul, ol i mas wok long ol fam long groim kaikai.

Sampela kalabus i save lusim haus kalabus olgeta de long go wok long ol faktori o mekim ol narapela wok. Wok i pinis, orait ol i mas go bek long haus kalabus. Long fotnait, olgeta mani i go bek long haus kalabus na ol bikman bai i skelim hap i go olsem kompensesen bilong



manmeri em ol i bin mekim rong long en na hap bai i stap long han bilong CIS. Dispela kain pasin i kamap tu long ol haus kalabus long Amerika na Australia tude.

As bilong dispela tingting nau em long helpim ol kalabus long wok na i no sindaun nating na wetim taim bilong ol long pinis kalabus. Dispela kain pasin i helpim tu ol dispela manmeri long luksave long rong bilong ol na traim givim bek wanem kain mani o helpim em ol i ken givim long stre-tim sindaun bilong ol narapela manmeri.

## Ol Saina i painim woa balus

LAS yia long mun Oktoba, tupela man Saina long ples Maoer long Guangsi provins i bin go raun long bikbus long painim sampela marasin bilong ples. Dispela hap ol i go long en i stap antap long

ol maunten longwe tru long ples, ol i mas wokabaut inap tripela aua olgeta.

Tupela i kirap nogut long painim wanpela balus bilong ami bilong narapela kantri. Tupela i

go bek long ples na putim ripot. Orait ol i salim sampela lain i kam bek long dispela ples na ol i painim bun bilong man, ol gan na ami medal bilong ol soldia. Ol i luksave olsem dispela balus em i



• Foren Minista bilong Saina, Mei Ping (lephan) i givim bek ol bun bilong ol soldia husat i bin dai long dispela balus i go long Ambasada bilong Amerika, Jim Sasser.

## WAN SOLWARA

### Niuspepa i gat kot

Tupela bikman bilong Polynesian Airlines i kotim wanpela niuspepa long Westen Samoa ol i kolim Samoan Observer. Bos bilong Polynesian Airlines Richard Gates na manesa operesen Ian Gemmel i kotim dispela niuspepa na wanpela bisnisman, Papalii Steve Percival.

Gatesna Gemmel i laik niuspepa i mas baim ol long K478,260 kompensesen. Tupela i kotim dispela niuspepa bikos long ol stori i kamap insait long niuspepa bihain long wanpela Twin Otto balus i bin pundaun long Janueri 4 na tripela pipel i bin dai.

Tupela bikman ya i tok ol stori em niuspepa i wok long raitim i bagarapim gutpela nem bilong tupela.

Papali i bin raitim pas i go long dispela niuspepa na tok Gates em i boi bilong gavman.



• Ol pipel long Sofia, biktaun bilong Bulgaria i wok long protes las wik.

Long 1989 ol i rausim komunis lida Todor Zhivkov. Ol pipel i protes na singaut long rausim komunis gavman. Ol i kamap oposisen kolisen Yunion ov Demokretik Fosos.

Long 1990 mani i sot na kaikai i sot. Ol yunion i straik inap 7-pela de na gavman bilong ol Soselis i pundaun.

Long 1994 ol Soselis na oposiesen i les long bung wantaim na kamapim gavman.

Pait i kamap namel long ol pipel, pe bilong petrol i sut i go antap, mani bilong kantri i no gat strong moa. Ol Soselis strong na i win.

Long 1995 ol pipel i statim ol protes. Gavman i grisim ol pipel long putim mani long ol invesman projek tasol planti bilong ol beng i pas na mani bilong ol pipse i lus. Flaua i sot na prais bilogn bret i sut i go antap na mani i sot tru long kantri.

## na bodi bilong ol soldia

wanpela balus bilong Amerika ol i kolim B-24 boma.

Dispela balus i karim 10-pela soldia i bin lus long dispela hap moa long 50 yia i go pinis long taim bilong Namba tu Wol Woa.

Ripot i tok balus ya i bin tromoi bom long ol sip bilong Japan long Takao haba long Taiwan na i mas painim bagarap long taim

em i kam bek long bikples Saina.

Balus i pundaun long ples nogut tru we i no gat manmeri i save go raun long en olsem na nogat man i painim inap 50 yia bihain.

Ol famili bilong ol dispela soldia long Amerika i amamas tru long taim ol i harim nius. Moa

long wan tausen balus bilong Amerika i bin lus long Saina long taim ol i pait egensim Japan. Saina i bin bung wantaim Amerika long pait egensim ol Japan long taim bilong woa.

Tupela wik i go pinis, Saina i bin givim bek bun bilong ol dispela soldia long ol man i makim gavman bilong Amerika.



• Nau em i taim bilong kol long hap bilong Yurop na Amerika na sno i karamapim ples. Planti raun wara tu i kamap ais. Long hap bilong Kanada, 300 man husat i go painim pios i stap long raunwara Simko long las mun i bin kisim taim. Bikpela win i mekim na ais i bruk long sampela hap na helikopta i mas karim ol dispela lain i go putim ol long graun. Neks de ais i kamap strong gen long raunwara na Craig Black wantaim siksipela poro bilong em i kalap long ka na ran i go. Tasol sori tru, ais i bruk na drapela lenkrusa bilong ol i planim insait long wara. Ol i laki long kalap long windo bilong ka na ranawe.

# Ol pipel bilong Bulgaria i belhat

**B**ulgaria em i wanpela kantri we bipo i bin stap aninit long komunis gavman wantaim ol arapela kantri olsem Rasia insait long Soviet Union. Tude Bulgaria em i independent kantri na i gat gavman bilong em yet. Tasol nau i gat planti trabel i kamap long dispela kantri.

Ol pipel i les na i laik senisim gavman. Ol promis em gavman i bin mekim long taim ol i rausim komunis gavman long 1989 i no karim kaikai. Prais bilong kaikai, trenspot na ol arapela samting i sut i go antap tru, ol benki pas na ol pipel i stapo olsem ol lus manmeri tru ya.

Bulgaria i gat moa long 8 milien pipel. Na ripot i tok ol i lus lain stret long Yurop. Sindaun i bagarap bikos

gavman i no stretpela gavman. Ol lida bilong kantri i stilim mani na rabisim tru kantri bilong ol. Gavman bilong ol em lain Soselis Pati i go pas long en.

Zhan Videnov i bin go pas long gavman tasol gavman bilong em i mekim na Bulgaria i no gat mani, em i kamap wanpela rabis kantri long Yurop.

Orait long mun Novemba, ol i rausim Videnov na putim Nikolai Dobrev. Dobrev i stap liklik taim tasol bikpela nogat man i laikim em.

Las wik ol i rausim em na givim wok i go long Petar Stoyanov. Stoyanov i laik ol i mas bung wantaim oposisen pati na wok gut long stretim ol dispela hevi long kantri bilong ol.

## WAN SOLWARA

### Tonga i memba bilong PITA

Tonga Telekomunikesen Komisin i kamap memba bilong nupela Pasifik Ailan Telekomunikesen Asosiesen, PITA. Jeneral Manesa bilong komisin Lemeki Malu i tok ol i kirapim dispela asosiesen long Hawaii long mun Januari.

Em i tok PITA bai i mekim wok bipo Forum Sekreteriet Telekomunikesen Program i bin mekim. Olgeta memba bilong PITA em ol 16 telekomunikesen meba bilong Saut Pasifik Forum. Bai dispela asosiesen i traim mekim wok bilong en i go inap long yoa 1999.

Opis bilong PITA i stap long Telekom Kompleks long Suva, Fiji. Bai olgeta memba kantri i toktok long dispela samting na baset bilong PITA long mun Epril.

### Sik bilong ai long Samoa

Ol helt opisa long Amerika Samoa i wari olsem sik bilong ai i kamap bikpela tru nau long hap. Dairekta bilog Helt, Dokta Joe Tufa i tok moa long 20 manmeri i bin kamap long haus wantaim dispela sik.

Em i tok lukaut olsem mobeta ol pipel i mas stap long haus inap sik i pinis orait ol i ken go bek long wok.

Em i tok dispela sik i isi tru long kalap i go long ol narapela manmeri olsem na em i tok mobeta ol pipel mas lukaut gut.

Dokta Tufa i kamap long televisen nius na toksave long ol pablik. Em i tok tu olsem ol skul i mas harim tok na stapim ol studen husat i gat dispela sik. Em i tok sapos moa studen i gat sik, orait mobeta het tisa i mas larim olgeta pikinini i stap long haus inap sik i pinis.

### Ol Solomon Ailan nius ripota kamapim asosiesen

Ol nius ripota bilong Solomon Ailans i gat nupela asosiesen bilong ol nau. Ol i kolim dispela asosiesen bilong ol JASI. I gat siksipela memba long eksekutiv bilong ol na edita bilong Solomon Sitisen niuspepa Earl Kapono em i nupela presiden.

Mista Kapono i tokim ol nius ripota olsem mobeta olgeta yet i mas strong long wok bilong ol na ripot long wanem kain samting ol lida i mekim bai ol pipel i ken klia. Em i tokim ol tu olsem ol i mas bihainim stret pasin bilong ripotim nius na i no ken mekim nating long laik bilong ol.

Dispela nupela asosiesen bai i kamap wanpela memba bilong Media Asosiesen bilong Solomon Ailan.

# LAI PSTAIL



□ Kanage i marit na lusim meri pikinini na em i laik ekting yangpela na raun nating long taun. Em i raun i go na lukim wanpela yangpela meri i wokabaut i kam na em wokim eksen long ai tasol. Meri ya lukim na bikmaus long Kanage; "yu kamautim aigras bilong yu ah. Pastaim yu les long em na yu lusim na nau olsem wanem, yu ting wanpela yangpela meri ah?". Kanage bekim, ah sore, ai bilong mi i paul ya, wanem kain meri mi painim ya, olbom bilong mi i kik yet ya.

## Kanage Bro Goroka

■ Kanage i sanap long sait bilong stua long Wewak taun i stap na lukim wanpela kum katim meri stret i wokabaut i kam long stua. Kanage i lukim meri ya na ai bilong em i op stret. Nau em giaman i go klostu long meri ya insait long stua na sanap klostu long meri ya. Nau Kanage isi wokabaut i go isi tasol long meri ya na blowim doti win bilong em long sait ia bilong meri ya. Meri ya i pilim olsem wanpela hot win i blo insait long ia bilong em na em kirap surik na bikmaus. Kanage i ting meri ya i aut pinis long em olsem na em wet tasol long harim bekim bilong meri ya. Tasol i no longtaim na brata bilong meri ya i kamap na meri ya i tokim brata bilong em long pasin Kanage i mekim long em. Taim brata bilong meri i tanim bek na kaikai tit, man wan tu tasol Kanage i lus long dispela hap. Ol manmeri i lukim das tasol i stap na bodi tru i nogat.

## Kanage Frens Wewak

□ Kanage i laik sanap long ileksen long Sandaun Open. Em i go long Vanimo taun long wokim aidi kat bilong em. Em i save olsem tambu bilong em i man bilong kisim gutpela poto olsem na em i go long haus bilong tambu bilong em long wokim poto. Em i kisim wanpela pren bilong em na tupela go long haus bilong tambu. Kanage i save stap bipo wantaim tambu long Vanimo na em i save long dok bilong tambu i bin liklik long dispela taim. Nem bilong dok em SNIKA. Tasol taim Kanage wantaim pren bilong em i go kamap, dok i ron i kam na bikmaus long tupela. Kwiktaim Kanage i tanim beksait long dok na pasim ai na wetim tit bilong dok long skin bilong em. Na pren bilong em tu i no gat rot na em sindaun long graun na pasim ai tasol na wet long wanem samting bai dok i mekim. Kanage i laik traim tingim nem bilong dok tasol em i lusim tingting. Em tingting long nem bilong dok i go tasol nogat na tambu bilong Kanage i kam daun long haus na stopim dok. Em nau Kanage pulim gut win na tok; ah SNIKA, yu beks long mi ah, bipo mi stap wantaim yu long Vanimo na yu no tingim mi ah. Yu ting yu fit long bekim olgeta kaikai na hatwok bilong mi long yu long bipo ah?

## Chawech Assin Vanimo

**Moa tok pilai long pes 16**

## Wanpela de long Parembe haus tambaran

### JOE KANEKANE i raitim

PLANTI pipel long Kantri na tu long ovasis i save harim ol kainkain stori long haus tambaran bilong ol Sepik na wanem ol kain pasin i save kamap insait long dispela haus.

Sampela stori mipela harim i tru tasol sampela bilong ol em kain we ol man husat i kam stori long mipela i mekim long tingting bilong ol.

Na sapos yu yet i laik save long wanem samting tru i save kamap long dispela kain haus yu yet i mas go long dispela ol kain haus long lukim long yu yet wanem ol samting i kamap.

Wanpela wik i go pinis mi bin raun i go long Wara Sepik we mi bin stap insait long wanpela pasin kastom we ol pipel long Parembe i bin wokim.

Paremba i stap arere tasol long wara Sepik na em i wanpela bilong ol las ples insait long Angoram ilektret.

Sapos yu laik i go long hap i gat tripela we yu ken bihainim sapos yu laik i go, yu ken kisim ka na go long Pagwi gavman stesen i kam daun long Sepik wara o yu ken kisim ka i go long Kubalia na bihainim rot i kam long Timbunke na kisim bot i go o yu ken go long Angoram stesen na kisim bot i kam antap.

Taim mi bin harim tok olsem bai mi go long dispela haus tambaran, tingting bilong mi i kirap, mi no bin stap insait long wanpela kain haus bipo, na wanem ol stori ol man i wokim bai kamap tru o nogat, dispela ol tingting i wok long pas long mi.

Mi wantaim man husat bai mitupela i go wantaim, Joe Gawi i redi long go long ples Kamanibit, na helikopta i kam kisim mitupela long go long dispela viles.

Tasol pastaim long mitupela i go long dispela ples, i bin gat sampela pasin kastom we mitupela i mas wokim long wanem ol i no katim mitupela olsem na long pasin kastom long dispela hap, mitupela i mas mekim sampela samting pastaim.

Mista Gawi i baim wanpela pik inap long mak long K600 olsem bai mitupela i ken givim long ol man long dispela haus boi pastaim long mitupela bai go insait.

Mi bin kirap nogut tru taim mi lukim dispela boi haus long wanem ples i bin klin moa yet, ol graun, ol plawa na gras i nais moa.

Pastaim long ol i larim mitupela i go insait long dispela boi ol man i tokim mitupela long wanem samting mitupela i mas bihainim taim mitupela i stap insait.



• Nupela Boi haus bilong ol pipel long Parembe viles. Foto: Joe Kanekane.

Man, taim mitupela i kamap insait skin bilong mi i kirap nogut tru long wanem samting mi bin lukim insait.

Maski, em i san ples ya i luk olsem em i tudak, ol kaving na ol samting i stap insait i wok long luk olsem ol i lukluk long mipela.

Tasol samting i mekim mi kirap nogut tru em we ol dispela 29 manki husat i wok long sindaun long ol hap liklik kona bilong ol.

Mi bin sem nogut tru long lukim ol long wanem maski mi smail long ol o mi traim long mekim sampela pes long ol long tok halo, ol i no bekim wanpela eksen bilong mi, ol i wok long lukluk strong long mi stap.

Mi yet i wok long tingting olsem, ol i mas i no wanbel olsem mipela i go long haus bilong ol, long wanem ol i mas ting olsem mipela i no soim rispek long ol.

Mi tu i wok long pret long lukim pes bilong ol long wanem mi i no inap long lukim gut pes bilong ol, ol i penim pes bilong ol wantaim waitpela graun na ol i luk olsem ol tambaran. Dispela graun em ol rabim antap long skin bilong ol long mekim dispela ol hap ol i katim long en long drai hariap, na mi ken lukim olsem ol dispela yangpela man i pilim bikpela pen i stap.

Mi bin harim olsem ol tisa bilong haus boi i bin tok save long ol boi olsem ol i no ken toktok wantaim ol lain i bin kam insait, olsem na mipela i sindaun na lukluk tasol.

Long dispela taim mi bin go lukim ol manki ol i bin stap olsem tupela mun na long

tupela wik i go pinis ol i bin katim skin bilong ol.

Taim wanpela tisa bilong ol i stori long mipela long ol we bilong katim skin na wanem samting ol i save wokim, man mi pret nogut tru, na mi laik lusim kwik dispela haus na go ausait.

Dispela tisa bilong ol i tok olsem ol man bilong katim ol man i save yusim ol naip i sap olsem resa blet na pulim skin na katim, bihain tasol long ol i katim ol i save paitim dispela hap we blut i save kam olsem bai em i ken solap long bihain taim.

Orait ol manki i mas sindaun antap long kandere bilong ol long wanem sapos papa o brata bilong ol i holim ol taim ol i katim skin bilong ol bai ol i sori na ol i no inap long larim ol man i pinisim olgeta wok.

Taim ol i save katim ol i save katim baksait na bihainim kain skin olsem bilong pukuk na tu ol i save katim arere long tupela susu bilong ol man.

Bihain long ol i katim ol i save putim sampela kain marasin bilong bus, antap long dispela ol skin na ol i save larim i drai.

Mi wok long tingim kain ol hevi ol i save kisim taim ol i laik slip, long wanem long baksait na fran bilong ol i gat sua na ol i mas sindaun na slip long sait.

Dispela tisa bilong boi haus i stori tu olsem taim ol i katim ol manki pinis ol i save stap insait long haus inap olgeta sua bilong ol drai na bai ol i kam ausait.

Long dispela taim ol i save pasim olgeta geit bilong boi haus na mekim spesel toilet

bilong dispela ol manki long yusim.

Long taim bilong katim skin i gat sampela ol manki i save dai tasol ol tisa bai i no inap long toksave long papamama inap long taim ol manki i kam ausait long haus.

Taim bilong katim skin i pinis orait em i taim bilong kaikai, long wanem ol manki i lusim planti blut olsem na ol i mas kaikai gut long kisim bek dispela ol hap blut ol i lusim.

Dispela taim ol manki i save kaikai long moning, belo na apinun na man skin bilong ol i save fat nogut tru.

Bihain long dispela i save i gat bikpela singsing taim dispela ol manki i kam ausait na traim testim dispela ol pawa ol i kisim long dispela haus boi.

Ol i save bilip olsem taim bilong katim skin yu mas lusim dispela blut we mama i karim yu long en na yu mas kisim nupela long wanem wantaim nupela blut em i wankain olsem yu bai bon o kamap nupela gen.

Long dispela as bai yu gat moa strong long wokim gaden, pul long kanu o laip bilong yu bai stap i go moa yet.

Tisa bilong haus boi i pinisim stori bilong em na mipela i go ausait long haus, taim mipela i go ausait mi kisim win gut na putim tingting bilong mi i go long mak gen.

Man, mi bin harim stori bilong ol haus tambaran na mi gat sans long go insait na lukim mi yet, nau sapos ol man o ol lokel turis i go lukluk long ol kain hap olsem na kam bek bai mi ken save wanem samting ol i wok long toktok.

# IFC stretim mak bilong tin kaikai

INTERNATIONAL FOOD CORPORATION (IFC), bikipela tinpis faktori long Lae i gat ol nupela kain masin we i ken mekim ol tinpis. Nau yet, em i go pas long ol kainkain we bilong wokim ol kaikai insait long tin insait long Papua Niugini. IFC i amamas bikos em i helpim tru ol pipel, long we bilong gutpela stendad long prodak, sevis na to long kamapim ol nupela we bilong wokim tinpis.

I gat tripela kain tinpis IFC i save salim - Besta, Supreme na Master Ace. Besta em ol i save wokim long tangir. Ol stua i save salim long bikipela tin (150z), namel sais tinpis (7oz) na liklik tinpis (5.5oz). Arapela tupela kain tinpis em IFC i wokim long wel na tomato sos.

Supreme i gutpela tinpis we pe bilong em i no bikipela. Ol i save salim tinpis ya long bikipela tin (150z) na liklik tin (5.5oz).


Arapela tinpis Master Ace i no dia bikos IFC i wokim long helpim ol grasrut pipel.

Long olgeta kainkain tinpis, IFC i ggat wanpela prodak o tinpis we i wankain long en. Ol tinpis bilong IFC i save kamap long televisen, niuspepa, long ol stua na tu long ol tieta grup. Dispela tieta grup i raun nau long Momase na Hailans.

IFC i wokim tinpis bilong em long kamap olsem ol tinpis we i save kam long ol arapela kantri. Ol i save wokim tin long arapela faktori na bihain kisim i go insait long bikipela

kenning eria. Ol i save rausim bel bilong fish, het na tel, orait ol i putim go insait long tin. Taim ol i laik kukim ol i putim tomato sos na bihain kukim long tin. Orait bihain ol i larim i kol, na ol i putim skin bilong tinpis na putim i go insait long bokis. Olgeta de ol IFC kwaliti inspekta long sekim ol tinpis long sekim gut sapos ol tinpis i wankain olsem laik bilong ol PNG kastama. Ol wokman bilong IFC i save lukautim gut ol prodak bilong ol. Bikipela samting tru em haijin, swit bilong pis, laip bilong ol pis na tu

kwaliti bilong pis. Ol pipia bilong pis, ol i no save tromoi. Ol i save yusim gen long wokim ol arapela prodak olsem fishmeal. Dispela ol fishmeal me i gutpela tru long ol kaikai bilong ol animel. IFC i bin tromoi olsem K3.5 milien long wokim faktori bilong fishmeal. Fish Oil em wanpela bilong ol prodak we IFC i save wokim long ol haphap pis. IFC tu i save lukautim gut ol pipia wara o rabis wara bilong faktori. IFC tu i gat ol bikipela paipwara bilong rausim ol wara nogut long noken traim na bagarapim envi



romen bilong Papua Niugini.

Long IFC, em i givim bikipela taim tru long trening na developim ol yangpela pipel bilong Papua Niugini. I gat 700 ol wokman bilong IFC em bilong Papua Niugini. Sampela i wok olsem biklain na sampela tu i holim bikipela posisen long menesmen bilong IFC kampani.

Nupela kain ol teknoloji na trening i helpim Papua Niugini wantaim nupela ol save na sistem olsem kwaliti kontrol, fainens na menesmen long helpim

ol papua niugini pipel long bihain taim.

Wokim tinpis insait long kantri tu i helpim tru ol arapela bisnis. Ol bokis bilong putim Besta and Supreme tinpis, em ol i wokim long ya. Dispela i givim bisnis i go long wanpela lokel kampani. Ples bilong salim ol tinpis na ol pepa bilong adve-taisim tinpis tu ol i wokim long ya.

Trenspot bisnis tu i kisim tu helpim long IFC. Ol tinpis bilong IFC ol i kampani i save kisim na salim long olgeta hap bilong



kantri. Dispela i helpim tru long kamapim planti ol wok bisnis ya.

Dispela bisnis i karamapim ol eria olsem fainens, transpot, printing na ol fainensel institusen. Dispela olse

nis i kamap bikos IFC i wok long kamap bikipela tinpis kampani insait long kantri. Bikipela senis tru em IFC i wok long kamapim planti ol wok bilong ol pipel bilong Papua Niugini stret.

# Em gutpela Em Besta!



Mipela save kukim gutpela Mackerel long stail bilong PNG stret, olsem na femili bilong yu bai laikim tru nupela teis bilong Besta.



**Tinpis bilong PNG stret . . .**



Bik  
Bro

# REBO



MI MAS GO  
PAINIM OL... NO-  
GUT OL I KISIM  
BAGARAP!

REBO KISIM BIKPELA  
KANU BILONG PAPA  
BILONG EM NIA SUBIM  
IGO AUT LONG SOLWARA



SOLWARA I BAGARAP TRU  
TASOL REBO INO WARI  
TUMAS...

KANU BILONG PAPA I  
STRONG TRU... MI GAT BILIP  
OLESEM EM BAI KARIM  
MI GO LONG AILAN..



LONG AILAN, KANU BILONG AUDA NA  
LAPUN I BRUK LONG NAMBIS...

BUDUM!  
SPLASH!



TUMBUNA! SOLWARA  
BRUKIM KANU BILONG  
YUMI YAH!

OH!!  
NO!!

"BAI YUMI GO BEK  
LONG PLES OLESEM  
WANEM?"

AIVOO!  
MI PRET  
YAH!

# SRAK MAIK!



STORI I KAM LONG  
LAS WIK...

MAIK I  
SINDAUN  
IGO NA  
AI BILONG  
EM I SLIP...

UH-UH  
AH... ZZ  
ZZZ...



ZZZ... \* \* \*



HOI!!!

ZZZ  
HUH!!



UH-ESTA  
LEWA... UH...  
HOLIM MI...



KIRAP!  
MINO  
MERI  
BILONG YU!  
SLAP!! \* OUFF!!



NEM: Mercia Pande 14 (meri), Sila Tim 14 (meri), Sabina Mawan 14 (meri) na Thelsa Adu 14 (meri).

ADRES: Mandi Primar School, PO Box 197, Wewak, Is Sepik provins.

LAIKIM: Lukim TV, harim musik, pilai spot, swim long wara, tok pilai, ritim buk na raitim pas.

NEM: Alu Telabe

KRISMAS: 20 (man)

ADRES: PO Box 1378, Mt Hagen, WHP

LAIKIM: raitim pas, harim reggae musik na tok pilai.

NEM: Morris Kumaru

KRISMAS: 18 (man)

ADRES: PO Box 590, Wewak, Is Sepik provins.

LAIKIM: pilai gita, pilai soka, harim musik, na mekim pren.

NEM: Godfrey Tanak

KRISMAS: 16 (man)

ADRES: 93, Kimbe Wes Nu Briten provins

LAIKIM: Pilai soka, lukim PNG Top 20, tok pilai, mekim pren, na raitim pas.

NEM: Cecilia M

KRISMAS: 18 (meri)

ADRES: PO Box 658, Lae, Morobe provins.

LAIKIM: pilai basketbal na soka, lukim EM TV, na harim reggae musik, go lotu na tok pilai.

NEM: Nick Andrew

KRISMAS: 17 (man)

ADRES: c/ Nixon Andrew, PO Box 124, CIS Vanimo, Sandaun provins.

LAIKIM: Pilai soka, pilai volibal, go waswas long solwara, harim reggae na pop musik, senisim ol poto na go long danis.

NEM: Jacob Wesley

KRISMAS: 18 (man)

ADRES: Ten City, PO Box 4027, Lae Morobe provins.

LAIKIM: Go long lotu, go long kem na autris, harim gospel musik, go piknik wantaim ol yut na autim tok long ol arapela brata susa.

NEM: Tomy Marrai Domai

KRISMAS: 15 (man)

ADRES: Sumia Primary School, PO Box 708, Mendi, S. H. P.

LAIKIM: raitim pas, go long lotu, pilai basketbal na harim musik.

NEM: Terry Nimda 19 (man) na Francis Makis 23 (man)

ADRES: PO Box 1050 Madang, Madang provins.

LAIKIM: Pilai soka, volibal, tok pilai, raitim pas na ritim niuspepa na senisim ol poto.

NEM: Joe Olgm 27 (man) na Sotty Ben 12 (man)

ADRES: PO Box 1135, Hagen, WHP.

LAIKIM: Pilai ragbi, soka, go long lotu na harim musik.

NEM: Freda Ben

KRISMAS: 17 (meri)

ADRES: Galai One AOG Church, PO Box 614, Kimbe, WNPB.

LAIKIM: Pilai volibal, pilai netbal, harim gospel musik, reggae musik, raitim pas, waswas long wara na tok pilai.

NEM: Doreen T Weiyo

KRISMAS: 17 (meri)

ADRES: Dasi Catholic Church, PO Box 125, Vanimo, Sandaun provins.

LAIKIM: Raitim pas long ol pren, pilai soka, volibal, harim pop musik, go lotu na skulim ol pikinini long pri skul.

NEM: Tobias Mean

KRISMAS: 17 (man)

ADRES: Daikin PO Box 2112, Lae Morobe provins.

LAIKIM: Pilai gita, harim musik na ritim baibel na harim musik.

# Save go daun long baret

## ... Ol hevi tude long skul

### ADDY LAVAKZ i raitim

Planti ol Koles, Yunivesiti, na Nesenel Hai skul i painini hat taim stret insait long Papua Niugini tete long tok yesa long moa long 20,000 studen o sumatin husat i salim pepa bilong ol i go long ol dispela ples bilong kisim save.

Dispela i kamap bikos namba bilong ol sumatin ya i bikpela tumas long namba bilong ol spes insait long ol Yunivesti na ol bikpela koles insait long Papua Niugini.

Planti papamama i save wari na i save tokaut olsem dispela pasin bilong tok nogat long pikinini bilong ol long olgeta yia i wanpela bikpela hevi tru long ol yangpela bilong yumi, long Papua Niugini tete.

Na gavman i mas tingting nau long wokim kamap planti koles na yunivesiti long karamapim dispela hevi.

Tasol yumi mas askim olsem yunivesiti. Na Koles em as tru bilong kamapim gutpela sindaun bilong ol sumatin long bihain o em i as tru bilong Papua Niugini i develop gut.

Yumi wok long luksave long nau olsem ol lain husat i kisim skul na ol we is stap nating i wok long supim het long painim kankain save long wokim ol wok we nogat man o meri i ken wokim bikos level bilong wok ya i antap o save bilong mekim wok ya i bikpela tumas.

Long bipo, sapos yu pinis long gret 10 o gret12 yu ken painim wok long benk o nogat yu ken kamap wanpela nes long haus sik.

Nau sapos yu pinis long gret 12 long Nesenel Hai Skul yu ken painim wok long benk tasol long kamap nes long haus sik yu mas go yet long Koles long kisim digri o diploma long wok nes, bipo long yu kamap nes.

Ol kampani na ol ples bilong wok i laikim tasol ol man meri husat i gat save i stap long pepa na i save kisim ol long wok na ol manmeri we i pundaun long skul bilong ol, ol i no save bisi o wari tumas long ol kain lain olsem.

Dispela i mekim na planti dropaut i painim we na rot bilong kisim inap save long painim gutpela wok tasol spes bilong kisim save i pas yet bikos planti studen tu i wok long go nupela long ol dispela koles o skul long olgeta yia.

Wanpela poin nau gavman i mas putim i kamaut ples klia

nau em olsem Papua Niugini i gat planti tumas tisa, o ol sosel wokmanmeri, o akaunten we i planti tumas long sais bilong wok bilong ol na gavman i mas katim daun namba bilong ol, namba bilong ol i mas wankain olsem namba bilong wok ol i mekim long en.

Sapos giviman i no senisim dispela hariap bihain long yia 2,000 bai PNG i gat moa moa yet tisa na nogat skul bilong ol long tis long en.

Narapela samting tu em sistem bilong lainim ol sumatin long ol wok we i no stap insait long Kantri o i no gat olgeta i wok long kamap bikpela.

Long taim sumatin i pinisim skul em i no gat wok, long wanem wok em i lainim ol sumatin tu em sistem bilong lainim ol sumatin i pinisim skul em i no gat wok, long skul ino gat long Kantri, olsem na save bilong em wara wasim mambu katim na i go daun long baret.

Nogat wok. As tingting tru bilong dispela em yut i no gat wok. 40% o moa yangpela manmeri i wok long painim wok yet long wanwan rijen long PNG na gavman i wok long yusim ol kain kain rot long traim pulim ol yangpela husat i no gat wok.

Long 1980 PNG i tingting olsem yu gat inap save bai laip bilong yu i gutpela. Na sapos yu kisim moa save bai yu kamapim laip moa gutpela.


Pikinini wokim moa stadi bihain long skul em bai kisim gutpela wok na sindaun bilong helpim mamapapa bilong em.

Gavman i save sutim nating, bel bilong ol sumatin long ol giaman toktok olsem na taim ol i pas long skul long go long Koles ol i painim olsem laip i bagarap pinis long ol. Planti ol edukesen saveman meri i tokaut olsem dispela nesen i mas senisim tingting bilong em nau.


Mipela i mas opim ol han rot insait long edukesen sistem bilong mipela nau. Yumi mas wokim rot i mas joinim praimer i go join wantaim sekenderi na teseri edukesen.

Maski long lusim ol i stap wan wan. Planti ol yangpela bilong mipela long bipo yet i kam inap long nau, mipela i wok long stopim ol long namel long rot. Em i taim nau yumi mas lusim ol i pinisem olgeta bikos ol i krai yet long dispela fridom gavman i mas givim long ol na maski long stopim ol namel long rot.

Ol i mas pinisim tru laik na tingting bilong ol long kisim moa save.



• ANTAP: Saigo Morombi, wanpela sumatin bilong Numbugu Komuniti Skul (Yawa) namel long Madang na Morobe provins . . . ANINIT: Ol yangpela boi long Hohola, Mosbi, i givim sotgan long polis las yia. Ol i laik senis laip na sindaun gut.





■ Kanage i go trening pinis na i kam sindaun ausait long haus long kisim win. Em sindaun i go na em lukim tupela poroman bilong em i draiv long ka na kamap long rot. Nau Kanage i singaut na tupela i stopim ka. Kanage askim; yutupela i go we? Na tupela i tok, raun tasol. Kanage amamas na kalap long ka na ol tripela i go na ka i go stop arere long wanpela bikpela hotel. Nau Kanage ting bai tupela pren bilong em i baim sampela kaikai na ol i kaikai. Tasol nogat, tupela poroman i tokim Kanage olsem bai tupela i go long cisko. Turangu Kanage i kisim hevi stret bikos em i werim sotpela trausis na werim slipa na T Siot. Nau tupela poroman i tokim Kanage, yu ken sindaun ausait na wetim mitupela. Tupela poroman i go insait long disko na turangu Kanage i bosim ka i go inap disko i pinis long 2 kilok moning.

#### Disko Man

#### Mosbi

□ Kanage i sik na i go long haus sik. Wanpela yangpela nes meri i kam na i askim Kanage long em i sik olsem wanem. Na Kanage i kirap na bekim; yu yet ges. Meri nes ya i lap na tokim Kanage, yu laik kisim marasin o nogat? Na Kanage bekim; save i stap long lewa bilong yu. Mekim na meri nes i lap moa yet na Kanage i tokim em gen; yu save long mining bilong marasin ah? Na meri nes i tok, marasin i stap na yu stap. Nogat bai sik bilong yu i bikpela moa yet na yu dai. Tasol Kanage i tok, mi dring olgeta kain kain marasin bilong tumbuna na bilong waitman tu na bodi bilong mi i no orait. Bikos marasin tru bilong stretim ol sikman em yupela ol nes meri i save haitim ya.

Sekyuriti bilong haus sik i sanap lukluk i stap na wokabaut i kam. Em kamap na holim Kanage long nek bilong snot na askim em; yu kam long kisim marasin o stori ah, ol nes i no bilong stori nating nating wantaim ol, ol i gat wok long stretim ol sikmanmeri stret. Em holim Kanage na tromoi em i go ausait.

#### Kanage Fan

#### Lae

■ Taim bilong ileksen nau na kainkain man i laik sanap long ileksen. Mekim na Kanage sindaun nogat na em i tu i laik sanap long ileksen tu. Kanage i stap long Mosbi olsem 6-pela krismas olgeta na em i save long planti manmeri tru bilong Mosbi siti. Olsem na tingting bilong em i paul long wanem ilektoret em bai sanap long en. Long Mosbi i gat, Mosbi Not Is, Mosbi Saut, Mosbi Not Wes na NCD. Tingting i go nogat na em tok, maski mi traim rijinol. Kanage statim kempen raun long Mosbi taun 'Votim Kanage 4 Gavana'. Planti manmeri lukim na ol tok beksait nabaut na tok, Kanage i gat wanem kain bekgraun na save long politiks? Tasol Kanage i gat ol edvāisa i tokim em pinis olsem na Kanage i kempen na tokim ol manmeri olsem; Mi em lida ya, chosen one, yumi kisim Independens pinis nau yumi mas kisim Ripablik na bihain yumi mas i gat Lod Meya, king na kwin. Na mi yet bai king bikos mi em the chosen one.

#### Dabol Bond

#### Mosbi

□ Kanage i save ring long wanpela maritmeri olgeta taim. Tupela i save gris long telifon i go na wanpela taim meri ya i tokim Kanage, "yumi mas lusim dispela kain pasin bilong gris nating nating long telifon bikos nogat bai i go tru". Kanage bekim; "na i go tru bai olsem wanem, husat bai stopim?". Na meri i tok, mi nogat tingting long mekim i go tru, mi laik tok pilai na amamasim filings na tingting tasol. Kanage harim olsem na bel bilong em i hat nogut tru. Em kirap na tokim meri ya; "harim a, mi wanpela las bet manki ya, nogat pren na wantok long toktok wantaim. Nogat manmeri i save laikim mi tu. Em orait mi nogut ya, tasol bihain yu lukim em bai yu tingim planti ya". Meri harim olsem na tokim Kanage, "mi no bin lukim nus na pes bilong yu yet. Olsem na mi no save gut long dispela sore pes bilong yu yet. Olsem na maski ting bai mi sori long yu". Kanage tok, laki mi no save long yu tu ya. Sapos mi save, bai mi strong olsem wel dok i pulim bun. Mi no wari long man bilong yu na ol brata bilong yu i paitim mi, mi bai salim skin tasol.

#### Kanage Lusboi, Hagen

# Man bilong helpim i lusim PNG

## EDDIE SAUNDERS i raitim

**R**ESIDENSE DAIREKTA bilong Friedrich Ebert Faundesin bilong kantri Germani Mista Fritz Kopsieker husait i bin helpim long sevim Demokratik sistem bilong PNG i no ken bagarap bai i go pinis long dispela Sarare Februari 15, 1997.

Mista Kopsieker i bin wok moa long tripela yia olgeta long Papua Niugini olsem long FES-PNG opis. Insait long dispela tripela PNG politikal na ikenomik sistem i bin seksek. Na Friedrich Ebert Faundesin aninit long lidasip Fritz i bin sanap wantaim PNG long helpim noken pundaun. Taim politik, konstitusen, media, ombudsman, tred yunion na liklik developmen i guria bikos long kainkain saveman i traim save na politik, FES i sanap strong wantaim pipol bilong PNG.


Freidrich Ebert Faundesin i givim mani long kamapim semina na woksop long dimokretik wei bai i save long wanem samting i kamap long kantri bilong ol na sistem bilong gavman bilong ol.

Resident Dairekta Mista Kopsieker i amamas long stap insait long dispela helpim i kam long PNG. Mi amamas em i tokim Wantok Nius dispela wik.

Demokrasi i mas olsem laipstail bilong ol pipol. PNG i gat dispela kain laipstail insait long moa long 700 kalsa bilong ol. Mista kopsieker i mekim dispela las toktok bilong mei gut bai long PNG. Dispela as tingting bilong demokrasi Friedrich Ebert Faundesin i save bilip na promotim long wok bilong em insait long olgeta ap bilong wel na PNG tu.

Olgeta manmeri na pikinini i mas prektisim demokrasi long haus, famili, ples na komuniti. I mas laipstail. Mista Kopsieker bai lusim PNG long Sarare Februari 15. Fritz i kam long Papua Niugini long 1994 wantaim meri na wanpela pikinini meri. Na em wantaim meri bilong em i karim las pikinini boi long PNG. Nem bilong em Kevin PNG. Pikinini meri i bin bon long Saut Afrikan wan wik bipo long ol i kam long PNG.

Em i bin wok long ap bipo em i kam long PNG. Na sapos i olsem bai ol pipol i no paul tingting planti long wanem kain gavman sistem PNG mas bihainim. Man wantaim meri i gat wankain rait long kisim wok, skul, politik na mekim bisnis. Residence Dairekta bilong FES long Papua Niugini i amamas na laikim salens wok em i mekim long PNG. Bikos taim em i kam stat wok PNG i kam inap dispela wik Februari em i lukim PNG olsem kantri i seksek olsem sip i ron long raunwin na solwara i kros. Mi lukim olsem politik na ikenomik na sosal developmen bilong PNG insait long tripela yia mi stap i givim mi salens long mekim



• Mista Kopsieker i toktok long nambawan Ombudsman komisena semina long Highland Travelodges hotel las yia. Foto: Eddie Saunders

wok bilong Faudensin na mi yet olsem dairekta long PNG.

#### Politiks na gavman sistem

Provisal o disentralaisensin gavman i givim bikpela seksek tru long Papua Niugini ol kantri. Na mekim ol tingting planti long wanem kain sistem i gutpela sisten tru i ken givim sevis. Na i no inap kaikai planti mani. Tasol i gat toktok pinis olsem nupela lokal level gavman sistem i no stat yet na daunim pinis tarapela mani bilong kantri. I winim mani namba bilong mani olupela ol yusim long ronim olupela provinsal sistem.

#### Fridom ov spis

Em wanpela nambawan ki bilong demokrasi gavman sistem PNG i bihainim. Refom i givim sans long gavman na ol lida long rekomending long senisim midia lo. Na dispela poretim planti manmeri. Gavman i laik kontrolim nau dispela rait bilong ol pipol. Mista kopsieker i tok FES amamas long lukim long helpim PNG long stretim dispela toktok. Na sponsarim ol semina long midia. Na dispela i karim kaikai gut tru. FES i amamas long dispela.

#### Ombudsman komisin

Taim kros na pait bilong ol lida i no lidim gut kantri na misyusim mani bilong pablik. Na Ombudsman Komisnin olsem wasdok painim mani long mekim awenes na givim skul long ol lida na ol pipol bilong PNG long wanem gutpela pasin bilong lida. Na

wanem samting i mas mekim taim lida paulim mani o bagarap. FES i mekim komitimen long givim mani long olgeta provinsal woksop. Na em bai givim yet taim Ombudsman i pinis olgeta kempen bilong em isnait long kantri. Na FES tu i salim ol wokman o sinia investigat i go skul long kantri lnglen teknik na stail bilong fraud.

#### Wokas yunion rait

Mista Kopsieker i amamas em i amamas tu long wok wantaim ol tred yunion insait long PNG Na ol Pasifik Ailen. Na em i amamas long ol tred yunion i strongim ol yet na sanap strong rait bilong ol memba. I gat wanpela gutpela developmen nau insait long kantri. Ol tred yunion nau bung wantaim na fomng bikpela strongpela yunion.

Dispela i kamap long indastri lain. Gutpela piksa i kamap pinis nau em, PNG Komunikesin Wokas na PNG Mining Enagi na Alaid Yunion. Olgeta lain woka insait long komunikesin indastri i fomim PNGWY (PNGWU) pinis. Na PNGME&AU i kamap olgeta kampani na oganaisesin i dil wantaim mining, karasin, bensis na ges.

Ol gavman dipatmen olsem Maining na Elkom i memba tu. Dispela bai pait bilong ol wokman. Mista Kopsieker husait i go nau i tok dispela amalgamesin o marit bilong ol yunion i kamap nau long olgeta hap bilong wok.

Bikos nau wel i senis nau. Ol bikpela kampani i wok long marit tu long strongim ol wokman na meri long wok. Na ol trangu wok man na meri long liklik kampani bai kisim taim. Olsem na amalgamesin bilong ol yunion tu i impoten mista Kopsieker i tok.

Tasol mi laik lukim ol yunion i mas wok bung wantaim yet. I gat bel hevi namel long ol lida insait long tred yunion. Na mi bai go wantaim bilip olsem bai ol bel gen na wok bung wantaim bihain.

#### Liklik bisnis promosin

Taim Mista Kopsieker i stap olsem Residence Dairekta bilong FES long PNG em amamas long lukim laik bilong kamap ol liklik bisnis developmen i groa. Friedrich Ebert Faundesin i save promotim liklik bisnis developmen hai na long ol arapela developim kantri long Afrika na Saut Amerika. Wanpela Mista Kopsieker i tingting gutpela samting em ol egensis i save mekim wok bilong promotim liklik bisnis insait long kantri i gat wanpela foram nau.

Long holim kibung na serim tingting na save long wanem samting ol i wok long mekim. Bai ol i no pait long wok. Tasol, wok wantaim serim na risos na helpim long developim ol liklik nesinol bisnis man na meri. Em yet i komitimen mani hostim lans bilong ol miting bilong olgeta miting bilong ol dispela lain egensis. Dispela foram o bung ol (SBDCC) Liklik Bisnis Developmen Kodinetin Kansol. FES i wok klostu tru wantaim Kum-Gie Kansait bilong Lae na SBDC.

#### Ol meri long bisnis

Na narapela nupela projek em Fritz Kopsieker i yet statim long taim bilong em yia em long helpim ol meri bilong ples long bisnis trening. Dispela em FES i stat wok wantaim dipatmen ov Sentra. Na givim mani long ranim ol bisnis developmen ov Sentra. Na givim mani long ranim ol bisnis developmen kos bilong ol meri long ples. Ol kamap long Rlgo, Hiri, Bereina na Goilala. Na dispela bai ol go ong Abau Distrik. Na stat long baim seken hap bilong dispela kos long ol meri, Mista Kopsieker em i amamas long statim dispela na laik i lukim i mas karim kaikai. Na em i bilip nupela man na ol nesinol i stap yet bai strong dispela wok.

Ol bikman bilong Friedrich Ebert Faundesin long Germani i amamas long wok bilong Fritz long PNG na givim em promosin. Em bai bos bilong Asian Pasifik opis long het opis bilong FES long Germani. Na em bai lukluk na sapatim yet ol wok long PNG na Pasifik.

Secretari bilong Fritz long FES PNG Korahi Lohia bilong bikples Hanuabada i tok em wanpela bos winim olgeta bos. Belisi pasin bilong em olsem yumi Papua Niugini stret. I gat ol wanwan bos tasol i dispela kain. Mi save lusim wok planti taim bikos long dai na hevi kamap long wanpela lain, em save larim mi go yet. Sapos mi i no inap kamap long wok mi mas ring tasol na toksave. Em i no wari. Mi bai misin em. Man bilong Korahi Tau i tok em wanpela bos i save andaster. Ol bikman bilong PNG tredyunion, liklik bisnis developmen, gavman, i mekim sem toktok.



# Raskel pasin kamap moa yet long kantri

## Dia Edita,

Mi grasrut manki na mi rait i kam long Wantok niuspepa long Edita seksen long autim bel hevi ol wari bilong mi long nau pasin raskel i kamap bikpela moa long Mosbi siti na arapela provins tu.

Dispela raskel pasin i bin kamap bikpela moa long las yia 1996, long mun Me i go olsem i kam inap yia 1997. Mi laik rait long ol pablik olsem i luk olsem bosman bilong ol C.I.D long 1996 i wokim wok stret long

kantri na tu polis dipatmen na kriminal divisen het na tu em karim nem bilong ol famili bilong em na tu pipel bilong Madang tu na em i bin lusim laip bilong em long mun Epril long yia 1996. Tete nau polis dipatmen bai kisim longpela taim long trenim wanpela opisa long spes bilong em we em bin lusim.

Yu husat brata o susa i sapatim o egensim rait tasol na mi ken lukim.

**Margut Panab Madang**

# Makim gutpela lida bilong Nuku

## Dia Edita,

Mi wanpela mangi bilong ples hap long Sandaun insait long Nuku distrik nau mi stap long Kimbe.

Mi laik autim belhevi na wari bilong mi i go long ol pipel bilong Nuku distrik.

Dispela yia 1997 em taim bilong ileksen nau yu husat yangpela man o meri long Nuku distrik yu mas lukluk gut na makim rait man bai sanap long ileksen.

Nau em las sans bilong yumi ol pipel bilong Nuku distrik bai yumi lukluk na makim rait man. Yu husat yangpela man o meri yu no ken harim gris bilong husat man i traim long ilek-

sen yu mas lukluk gut na makim wanem gutpela maus man yu laikim em.

Yu makim nating man em yu save pinis distrik bilong yu Nuku em bus. Yumi makim ol lida na ol i no lukluk long helpim Nuku. Ol i amamas long raun na kaikai tasol na i no tingim long stretim ples.

Olsem na yupela mas traim na makim rait man bai sanap long ileksen.

Em tasol wari bilong mi yu husat brata o susa i laik bekim em welkam tasol.

**Francis A Nuku Sandaun provins**

# Larim arapela kolim yu kristen

## Dia Edita,

Inap yupela givim mi spes long autim bel hevi bilong mi. Mi tok tenkyu sapos yupela mekim. Mi laik bekim pas bilong brata Paul Maiyene kamap long Wantok Niuspepa 25 Epril, 1996.

Mi yet bilong Lumi distrik tasol nau raun raun long Popondeta taun. Long pas bilong brata ya em bin tok olsem pasto Godfrey Wippon i bringim lait na spesel marasin em ol waitman i save haitim long yumi.

Em i go het na tok olsem pasto em kamapim tok tru na marasin bilong pinisim pasin tumbuna olsem sik, sua sanguma na poisen na tu yumi mas wok wantaim God, Jisas na Holi Spirit.

Brata mi laik tokim yu olsem papa bilong yu i no maritim mama bilong yu yet na lait em ol misinari bilong Roman Katholik bringim kam pinis long stopim ol tumbuna pasin olsem pasin sanguma na birua long Lumi distrik pinis. Na bihain mama karim yu na yu i go skul long skul bilong ol na nau yu kamap soldia boi na yu pulim ink long pepa.

Yu tok olsem lait pasto bringim i kam em long 1980 tasol ya bilong rausim pasin tumbuna olsem poisen, sanguma na pasin birua ya. Sapos tok yu mekim

em i tru ating yu i no inap kamap soldia boi na go pait long Buka. Na pasto i no inap i go long Australia na bringim lotu revaivol i kam long PNG.

Ating bai yutupela bun ros pinis long 1960s yet long pasin, poisin, sanguma na birua.

Yupela ol revaivol i no save serim ol samting o helpim ol pua man o ol lain i save mekim ol sin o ol pasin nogut. Yupela save tok yupela save helpim ol wan spirit na ol wan lotu tasol bai yupela kisim blesing. Na sapos lukluk long taim bilong Jisas, sapos i no kot ol sin man pua man o ol lain i stap longwe long God, ating God bai no inap long salim Jisas i kam long graun.

Long taim bilong Jisas em save raun wantaim ol man bilong kisim takis pamuk na ol lain stap longwe long God na em i bringim ol i go insait long banis bilong God. Na i no ol lain olsem ol parasie, ol save tok ol i holi na sin man noken tasim ol toktok wantaim ol a kaikai wantaim ol nogut sin pas long ol.

Yupela ol revaivol em olsem ol parasie save so op olsem yupela kristen tru. Wok bilong ol misin man em long wok wantaim turangu sin lain long mekim ol luksave long ol yet olsem ol pikinini

bilong God na ol mas i go bek long God wantaim toksori. Na long helpim ol long kamapim gutpela sindaun na helpim ol arapela.

Brata mi laik tokim yu olsem long kamap kristen em i no isi. Em i hatpela samting tru. Yu mas lusim laip bilong yu long narapela long sori long God Jisas na holi spirit olsem Jisas i mekim long yu na mi. Ol misinari na narapela wok bilong biknem lotu olsem Roman Katolik, Englikan na Luteran ol i lusim laip bilong ol long yu na mi na inap yu kamap soldia boi na Wippon olsem pasto. Sapos nogat ating bai yutupela bin ros pinis long 1960 yet bepo long lotu revaivol i kamap.

Brata long kamap Kristen i no isi samting na bilong senis long wan mun tasol. Senis i save kisim moa taim yumi olgeta bihainim tasol wok kristen pasin bilong Jisas i bin kamap klostu long 2000 yia i go pinis. Tasol em bai had tru long yumi long bihainim stret pasin bilong Kristen. Olsem na ol brata i no ken tok olsem yu kristen, larim ol arapela lain kolim yu Kristen long we, pasin na komitmen bilong yu.

**Camilus Dominic Popondeta**

# Nupela man mas senisim Somare

## Dia Edita

Mi wanpela papa bilong Wewak long Is Sepik provins na mi no amamas long tingting bilong brata Samuel Lapai em i tok olsem long 1997 ileksen bai yumi makim Michael Somare i go bek long palamen na kantri bilong yumi kamap orait gen.

Ating brata Samuel yumi olgeta pipel bilong Is Sepik yumi no laikim ol sem man tasol bai makim yumi long palamen papa Somare em i stap 25 yia pinis. Brata Samuel ating long Sandaun provins yumi i mas develop pinis ah?

Brata mi tokim yu plis yu kam long Is Sepik long Wewak taun na lukim yumi stap long tudak olsem na papa bilong kantri Somare em bai stap yumi mas lukim husat yangpela bai sanap resis long rijinel sit. Yumi no inap long pusim o westim nating taim bilong mipela long salim ol seim man yet i go kam maski ya.

Olsem na ating brata Samuel Lapai em tasol liklik tingting bilong mi na mi egensim tingting bilong yu mi kisim niuspepa bilong yu long 19, 1996 na mi bekim.

Sapos yu laik bekim gen em laik tasol.

**Willie Wabax Wewak**

# Makim gutpela lida bilong Kagua Erave

## Dia Edita

Mi wanpela boi long Pili Alepea CIS Kagua Erave boda SHP mi laik autim wari bilong mi i go long Wantok Niuspepa. Tupela provinsal memba bilong Kagua Erave. Tupela i no givim gutpela sevis i go long ol pipel bilong Kagua Erave boda.

Taim nominesen i op long 1997 ileksen ol manmeri long Kagua Erave ol mas lukluk gut pastaim ol planti maus wara kendidet, long 1997. Bikos ol i go painim pipia long Mosbi siti no gat gutpela sevis i go dispela 12-pela ples insait long boda bilong Erave. Ol i winim posisen na i go hait long Mosbi tasol i stap na i no kam bek long sevim long ol pipel bilong ples.

Eleksen bai kamap olsem na ol manmeri bilong Kagua Erave lukluk pastaim long ol mauswara man. Makim nupela kendidet. Liklik toksave long ol mama papa long Kagua Erave olsem ol famili bilong ol wantaim olsem yumi mas skelim man na givim vot bilong yumi i go long man yumi bilip em bai stretim gut sindaun bilong yumi long ples.

**Nathan Wama Yaki, Alepea CIS Kagua, SHP Mendi.**

# Gavaman i mas lukluk gut long polis fos

## Dia Edita,

Mi wanpela manki Simbu nau mi stap long Kimbe Wes Nu Briten provins na mi lukim ol samting i no stret olsem ol polis long provins o i save kisim ol risep polisman long helpim ol long wok.

Em i gutpela, tasol taim ol i kisim ol

risep polisman ol dispela man ol i holim ol wok olsem kampani menesa, kampani supa vaisa, ol tisa, na ol wokman bilong gavman yet.

Na trabel i save i go bikpela tru, olsem wanem long gret 6,7,8,9,10 dropout ol i stap nabaut long ples na provins. Traim na tingim, brukim haus, stilim moni stilim ol samting bilong ol polis na difens, long wanem ol man yet ol i save long wanem samting ol yet i go pas long en.

Kisim ol gras rut bai nogat planti trabel o stil pasin i kamap. Tasol i laik egensim o sapatim rait tasol long Wantok niuspepa.

**PNG Konsen Mosbi**

Sapos yu laik salim pen pren i go ovasis raitim leta long inglis

# Makim nupela gutpela lida long Menyamyia Open

## Dia Edita,

Yes mi wanpela manki bilong ples Kataga insait long Menyamyia distrik Morobe provins. Na nau mi stap long Mosbi na mi raitim dispela pas plis papamama long ples tingim gutpela man na makim X long box bilong ol. Yupela ting dispela man bai mekim gutpela wok.

Planti man bai kam na tokim yupela olsem mi tokim olgeta manmeri ol bai givim vot long mi bai winim dispela ileksen em giaman tasol long yupela bai givim vot long em. Plis papamama mi laik toksave long yupela olsem man bipo i stap pinis long memba na laik traim gen noken votim em.

Taim em i stap long memba em i no save tingting na lukluk i go long mipela mi i sindaun olsem wel pik. Taim mipela kam long Menyamyia graun malomalo na i pas long lek na bodi bilong mipela, olsem taim yu singautim pik bilong yu long givim kaikai long ol na ol i

rapim graun malomalo na kam insait long bus na lukluk na i go bek.

Em olsem mipela save olsem memba bilong yumi stap tasol mipela sori tru long dispela pasin ol save mekim long mipela wanem em i gutpela man em yupela save pinis orait makim dispela man wantaim bilip yupela man save go lotu harim tok bilong papa God orait dispela man em bai kam gutpela lida bilong yupela long ples.

Olsem wanem na gutpela sevis i go insait long Menyamyia olgeta hap gutpela savis i go na Menyamyia. Plis papamama na brata na susa noken toromi vot bilong yu nating nating long ol man i kam na givim moni. Yu husat manmeri yu laik sapatim pas bilong mi em raitim tasol long Wantok niuspepa. Mi bai amamas tasol mi yet.

**Abel Jacob Mosbi**

# Hua ailan i stap long wanem hap?

## Dia Edita,

Mi wanpela meri Kawbum tasol nau mi stap long Mosbi. Mi laik bekim pas bilong Konok i bin kamap long Otoba 10, 1996.

Brata i bin komplek long ol Induim pipel i save giamanim ol meri bilong narapela ples o provins. Mi sapatim pas bilong brata, na laik askim olsem wanem hap em Hua ailan?

Narapela samting em ol i save tok ol i ami. Ating olgeta Bareks long PNG em ol Indum manki pulap. Ol save ting ol i smat tasol nogat tru ya!! Husat laik bekim em bekim tasol.

**Meldee Rexsen Kabwum, Morobe provins**

# Politisen tingim gut toktok na mekim

## Dia Edita,

Plis mi laik bai yupela i ken givim liklik spes na mi autim wari bilong mi. Long Wantok niuspepa na ol pipel bilong Jimi na Simbai eria i ken lukim orait mi wanpela man bilong boda bilong Hagen na Madang provins.

Tasol nau mi stap long Mosbi na mi save harim long redio nius na Wantok nius papa. Tasol ol memba na minista bilong palamen haus em ol narapela provins tasol i save opim maus na save karim developmen o prodak i go long ples bilong ol tasol yu tupela memba bilong bilong Jimi Kimb na memba bilong Simbai George Wan yutupela i winim dispela sit na i go long palamen na yutupela kamap memba nating long hap.

Tasol nogat wanpela samting yutupela helpim ol pipel long ples olsem na long mun Jun em taim bilong ileksen olsem na yutupela i mas tingting gut pastaim na bihain bai karim balot bokis i kam long ples. Mipela olgeta pipel bilong yutupela distrik long Jimi na Simbai nau long 97 yia husat yu laik kamap long resis long 97 ileksen bai yu baim wan tausen kina long wanwan maus bilong manmeri pastaim orait bihain bai mipela votim yu. Em tasol toksave bilong mi na sapos yu husat man o meri i laik egensim o sapatim mi plis rait tasol long Wantok niuspepa na bai mi lukim tenkyu.

**Jerry K Mosbi**

### Mi painim brata

Dia Edita,

Mi laik putim dispela toksave i go long ol pipel bilong Kavieng na helpim mi long painim brata bilong mi long Kavieng Nu Ailan provins. Nem bilong em Cindertelly Yongaden na em bilong ples Inapnap viles insait long Laiagam distrik, Enga provins.

Bipo long 28 Desemba, 1982 em mas go long Kavieng na em no kam bek long pes na 14 yia i go pinis na mi painim brata bilong mi Cindertelly na mi putim dispela toksave i go long Wantok.

Mi stap long ples na mi kam pinis long Mosbi na mi stap long Mosbi na mi painim brata bilong mi.

Wanem hap long Kavieng yu stap nau. Mi laik kam long Kavieng na painim brata bilong mi tasol mi no save long Kavieng na bai mi no kam long Kavieng na ol manmeri bilong Kavieng. Yupela mas save long dispela man long Kavieng insait long Nu Ailan provins. Yupela mas ring mi long dispela long telepon namba 3260176 o 3267404.

Stap long Mosbi yet mi kam long Mosbi na mi raitim pas i go long Wantok.

Brata yu stap long wanem hap long Papua Niugini. Sapos yu stap long Kavieng bai yu raitim pas i kam long dispela edres P.O. Box 2535, BOROKO,

Jacob Waiakali  
Mosbi

### Gavman i no mekim gutpela disisen

Dia Edita,

Mi wanpela manki long ples, mi laik autim wari bilong mi go long ol lida bilong dispela kantri olsem nau yet mi stap na harim olsem nogat mani ong ronim kantri.

Dispela gavman i mekim ol kain disisen we i ken pulim na paulim dispela kantri i go na narapela kantri bai ronim na lukautim.

PNG gavman mi ken tokim yu olsem yu noken tingim yu yet, mi no wanbel liklik long tok bilong yupela, ating olgeta manmari ol wanbel long tok bilong yupela tasol mi nogat.

Yupela i no tingim laip bilong ol manmeri long dispela kantri mas yupela tingim yupela yet tasol na yupela mekim dispela tok. Yupela no ken paulim ol pipel bilong dispela kantri. Tingim laip bilong ol man na ronim kantri gut. Mi no amamas long ol disisen bilong dispela gavman.

Larim neks yia 1997 papa Michael Somare yet mas sanap na ronim kantri gut. Mipela noken kamap olsem tinmit na tinpis, tingim mipela na ronim kantri gut.

Mi wanpela boi we mi no save amamas long ol bilong ol narapela kantri, kantri olsem Japan kisim mipela em bai yu mi kisim taim stret. Lo bilong kwim em yupela stret, sapos yumi i stap yet long dispela lo bilong graun.

Em tasol na husat i laik bekim em laik tasol.

Boi Sandaun  
Vanimo

## No ken bagarapim nem bilong Sepik wara

Dia Edita,

Mi wanpela manki Sepik wara nau mi stap long Kimbe, Wes Nu Briten provins.

Mi laik bekim pas bilong brata Patrick Sapan long Kimbe olsem brata mi no amamas long yu pusim tok long ol Sepik wara tasol long raskel pasin long Wewak. Brata mi ting yu mas faul ya sekim yu yet.

I no ol Sepik wara tasol save raskel olgeta save wokim raskel pasin na bagarapim nem bilong Sepik. Bus, nambis na wara, brata mi no amamas long pas

bilong yu bin kamap long niuspepa bilong Tunde Januari 2 1997.

Long lukluk bilong mi long hia long Kimbe em ol Wasara Yangoru na Maprik save bikhet long taun o wokim raskel pasin raun long provins i no ol Sepik wara tasol.

Neks taim yu mas tingim gut pastaim na raitim pas long edita i no gutpela long bagarapim gut nem bilong arapela.

Em tasol husat i laik egensim o sapatim em orait mi wet long bekim pas bilong yu.

Emil Sailas  
Kimbe

# Wanem kain spirit em PNG Rivaivol sios yusim?

Dia Edita,

Wari bilong mi i olsem, mi pasto Hubert Saikou bilong Summah Senta insait long Lumi distrik i laik makim maus bilong olgeta brata susa insait long Niugini Revaivol Sios insait long PNG na tu ausait long PNG.

Mi tokim prinsipel Pasto Godfrey Wippon long tokaut stret long mipela long dispela narapela tok ples em Niugini Revaivol Sios i yusim long en. Long de bilong pentikos Holi Spirit i kam daun na ol bilip man i mekim tok long kankain tokples bilong narapela ol

kantri na mi bilip olsem i no long dispela tok ples nau mipela i yusim em long taim bilong wosip o taim bilong beten long sik manmeri. Mi ting olsem yu i giamanim mipela olgeta i kisim narapela kain spirit olgeta kaikai bilong dispela spirit mipela i kisim i gat pait long en, dispela long wanem mipela i save daunim ol arapela sios bilong God na mipela i putim mipela i go namba wan tru long ol arapela sios (Luk 18: 14-17) mipela i nogat pasin bilong daunim mipela yet.

Toktok long kankain tokples em i olsem sapos pasto

Godfrey em i stap long Wewak na planti ol manmeri bilong Kubalio i no bihainim pasin bilong God orait papa God bai yusim pasto Godfrey long toktok long toktok ples bilong Kubalio stret bai olgeta manmeri i ken tanim bel, bai olgeta i ken kirap nogut long dispela na bai ol i tok dispela em man bilong Lumi tasol hau na em i toktok long tok ples bilong yumi stret. (Aposel 2: 4-7) dispela em i stret olgeta long de bilong Pentikos na holi spirit i kam daun.

Mi laik mekim tok klia long olgeta manmeri insait long Rivaivol sios long PNG olsem,

mipela olgeta i mas wanbel na painimaut stret long dispela spirit mipela i gat long en.

Mi save planti ol brata susa na ol pasto na lida bai bel hevi long dispela tasol mi laik tok klia nogut mipela olgeta i lus long ples nogut (Mt 25:41).

Em tasol long dispela bel hevi mi i gat long en wantaim prinsipel pasto Godfrey Wippon.

Pasto Hubert Saikou  
Niugini Revaivol  
Summah Senta  
Lumi, Sandaun provins.

## No ken pait long pablik ples

Dia Edita,

Mi wanpela meri long Bultaun tasol nau mi stap long Wau. Mi laik autim liklik wari bilong mi i go long Pablik. Igo long ol meri husat save kros pait long man long pablik ples. Em i no gutpela tumas. Sapos yu save olsem yu wanpela mi laik tokim yu.

Tanim bel long pait long man long pablik ples. Mi bin lukim stret long ai bilong mi long wanpela apinun o meri kros long ol ben memba bilong Kopex ben antap long Wau. Maski ol man husat save pilai ben em ol man

bilong planti meri olsem na noken bi long kros long ol.

Nogat ol kam na giamanim yupela na yupela westim taim bilong yupela long kros pait long ol. Na ol go bek long ples bilong ol na daunim poin bilong yupela ol bai tok ol meri Wau pait long mipela. Samting tru ia i no olgeta meri Wau. Em tasol liklik wari bilong mi sapos yu husat laik bekim mi bai amamas tasol long lukim

Reema Kay  
Wau Kolples



Salim pas i kam long:

WANTOK NIUSPEPA  
PO BOX 1982  
BOROKO, NCD

## Woa insait long wol

Dia Edita

Mi laik toktok long wanem na i gat ol bikpela trabel i kamap long wol o graun tude.

Kain ol trabel olsem woa, na ol kala skin pipel na ol wan tokples pipel na tu wan graun pipel i wok long pait long pait bilong woa tude. Long niupsepa, radio na television i tokaut olsem ol i pait long wok politik tasol. Pait long kamap olsem kantri bilong en yet independens.

Kain ol trupela stori na piksa olsem long Midel Is bilong dispela wol, em ol lain Palestin na kantri Israel.

Long olgeta hap bilong graun i gat dispela woa i stap. Long Esian rijen yumi lukluk long Sri Lanka na taim Tiger rebel grup, Saina and Hong Kong na Taiwan, Filipino na rebel grup, Thailand na Kama Ru rebels, Is Timor Wes Papua OPM na Indonesia.

Na tu i komplek i stap long Saina na Japan long wanpela liklik ailan na Filipin na Saina tu na Japan na kantri Rasia long Spraitly ailan tu.

Long Yurop, kantriInglan na Noten Ailan, long kantri Iraq na Kurdist rebel na kantri Teki tu.

Long Osenia rijen kantir PNG na Bogenvil ailan, Nu Kaledonia, Frens Polenesia, na kantri long Yurop na Frens.

Ol dispela ol lain grup ol i pait long

kisim independens tasol na i no long narapela samting moa.

Tasol long dispela taim tu long wol ol bikpela kantri long hap bilong Yurop i toktok long kamapim wanpela kain sistem tasol.

Yunited Nesen, Yuropien Yunion Yuropien Ekonomik Komyuniti i wok long bihainim wanpela kain sistem lo polisi na wanpela lain grup i go go pas.

Na tu ol Noten Atlantik Triti Ogenaeesen long Westen Yurop i kamap long was long hap na tu i tok orait long kantri Jemeni long joinim dispela narakain olgeta.

Ol lida long wol i paul long ronim wol na stretim hevi, em i las de Baibel propesi i karim kaikai. Mathew 24: Revelesen 13: Jenesis 11.

Philip Amatus  
Vanimo.

## Meri Sepik i dia tumas

Dia Edita,

Mi laik askim pas i go long ol papa na mama long ol meri Sepik olsem. Olsem wanem na papa na mama i save apim pe bilong yangpela meri i go long bikpela moni tru?

Prais bilong baim ol meri Sepik nau i go antap tumas winim prais bilong tumbuna na bipo. Mi i no amamas long dispela prais. Plis mi laik bai yu husat man o meri bilong Sepik i mas bekim dispela pas bilong mi.

Olsem wanem mipela save askim ol papa na mama i save tok olsem yu gat laik yu mas baim tasol. Mi i no amamas long dispela pasin long Sepik ol i makim kain bikpela prais. Mi laikim wanpela boi mas bekim dispela pas i kam long Wantok niuspepa bai mi save long dispela tok i kam long yu. Mi wan manki bilong Sandaun rait na askim save. Em tasol na tenkyu.

Alphonse Souse.  
Wewak

## Salim mobail skwat long Aitape

Dia Edita,

Mi wanpela rait na sapatim pas bilong brata ya Peter Joelo i bin kamap long Wantok niuspepa long Januari 9 1997.

Yes brata mi sapatim tru dispela pas bilong yu. Ating mi ting na lukim olsem bilong yu we na pasin ol polisman bilong Aitape i save wokim em ol lain bilong sevim ol wantok na ol pren tasol. Ol i save dring 6 peks SP wantaim em ol bai i no inap sasim ol.

Olsem na mi ting olsem lo na oda long Aitape i mas wok strong long dispela yia 1997. Na tu bikpela samting tru em i mas i gat wanpela (mobail skwat) long Aitape bikos i gat planti ol bikhet man i stap. Maski polis i stret hevi long sait, ol bai mekim nois na bikhet long sait i stap.

Mi wanpela pikinini Aitape stret mi kam stap long Aitape tupela yia nau mi harim i stap long Karanas kantri solwara katim. Mi bai amamas tasol long harim husat i sapatim o egensim pas bilong mi.

Max Aunton  
Aitape

## Lukluk long Lavege rot

Dia Edita

Mi wanpela manki Hoskins mi gat bikpela wari tru long Lavege rot mi laik askim Nesenei Gavman na Provinsal Gavman long lukluk long Lavege Rot.

Long wanem ol pipel bilong Lavege i save wokim nupela developmen tasol rot bilong ol i no gutpela. Dispela em wari bilong mi sapos tu husat i no bilip long wari bilong mi.

Kisim ka bilong tu na ron i go long Lavege rot na bai tu lukim gut long ai bilong tu. Long

wanem taim bilong 97 ileksen kam klostu pinis no ken kam na giamanim ol pipel bilong Lavege em tasol.

Mipela i gat dispela bikpela hevi na mipela i no inap bilip long husat man i kam kempen nating long ileksen. Sapos em i ken mekim samting tru long stretim dispela rot bilong mipela bai em i orait tru.

David Galia  
Mangi Hoskins.



# WANTOK PABLIK NOTIS

Sapo yu laik advertais, telepon 325 2500 na askim long

Miri Aiori Ext. 214  
Jeffrey Maliou Ext. 215  
Jack Mahuru Ext. 217


## AIOME ANGLICAN HIGH SCHOOL MADANG PROVINCE

This new and expanding boarding Anglican High School has vacancies for FOUR teachers willing to start as soon as possible.

If you are genuinely interested in being part of this exciting school, are willing to share accommodation until new houses are built, and are "willing to sacrifice" some personal comforts, please apply immediately to:-

**Mr Dennis Kabekabe, Headmaster  
Aiome Anglican High School  
Private Mail Bag, MADANG.**

State the subjects you are qualified to teach and give a brief summary of your qualifications, your career-to-date and your interests.



Word Publishing  
Company Pty Ltd

## POSITION VACANT

## SENIOR REPORTER - WANTOK

Wantok is Papua New Guineas only Tok Pisin newspaper and as such enjoys a unique position in the media market place.

We require the services of an experienced senior reporter with sub-editing skills to start immediately. References required.

Please send details to:

**Acting General Manager  
Word Publishing Company Pty Ltd  
P.O. Box 1982  
BOROKO NCD or Fax: 325 2579**

# PROMOTE YOUR BUSINESS

WITH

**WANTOK**


**THE  
Independent**

**PNG  
BUSINESS**

Are you launching a new business, celebrating an anniversary, staging a big event or exhibition?


**WE CAN HELP YOU TO TELL YOUR  
POTENTIAL CUSTOMERS ABOUT IT!**

Simply call our advertising department and we will send a representative to you for advice.



**WORD PUBLISHING COMPANY PTY LTD**

Phone 325 2500 Fax: 325 2579



# PNG BUSINESS



Keep up to date with the latest happenings in the business and investment sector of Papua New Guinea by reading your copy of PNG BUSINESS.

Published at the end of each month, PNG BUSINESS is distributed direct to its target market, the decision makers and looks to comment on such items as new product releases, new company openings, any new initiatives which may influence local trade, changes to key management etc...

## ENSURE YOU STAY INFORMED WITH PNG BUSINESS

PROUDLY PUBLISHED BY WORD PUBLISHING COMPANY PTY. LTD. P.O. BOX 1982, BOROKO, NCD, PHONE: 325 2500 FAX: 325 2579.

**PUBLIC SERVANTS VOLLEYBALL ASSOCIATION DRAW**

Season Proper - Week Eleven

Date: Sunday February 16, 1997.

Venue: Sir John Guise Indoor Stadium

**Court One**

Time	Teams	Div	Officials
9.30	P/Reform vs IPA	WB	DEC & IRC
11.00	C/Duster vs NPF	WB	P/R & IPA
12.30	BPNG vs NCDC	WA	C/D & NPF
14.00	PTC vs S/Comm	WA	NCDC & BPNG
15.30	DEC vs IRC	WA	PTC & S/C

**Court Two**

9.30	D/Central vs IRC	MB	N/F & H5000
11.00	IPA vs NPF	MB	D/C & IRC
12.30	Lands vs PTC	MA	IPA & NPF
14.00	Works vs Uni	MA	PTC & Lands
15.30	N/Parliament vs H5000	MA	Uni & Works

**Court Three**

9.30	D/Central vs GPO	W/B	P/R & GPO
11.00	N/Parliament vs University	WA	D/C & GPO
12.30	Lands vs Works	WA	N/P & Uni
14.00	House 5000 vs Finance	WB	Lands & Works
15.30	NCDC vs DEC	MA	Finance & H5000
16.00	P/Reform vs GPO	MB	NCDC & GPO



• PNG pukpuk pilaia na Tahiti pilaia resis long bal long las wiken gen. PNG Pukpuk i winim Tahiti 92-6.


**OL RAGBI LIG NA RAGBI YUNION EKSEN POTO BILONG LAS WIKEN**



• Wapela bikmen pilaia bilong Brisbane Broncos Wendell Sailor painim spes long ron. Tim bilong em i winim dispela gen wantaim ol Supa lig Cowboys 16-8.



• Michael Hancock i nogat we taim wapela pilaia bilong cowboys i bin holim pasim em.



• Cowbys namba 13 pilaia kisim taim long tupela Broncos pilaia long Mosbi las wiken.



• PNG Pukupuk tim redi long kisim poto bilong ol.

# Bisini bai paia long PSSA gren fainel

## NCDPSSA SOKA FAINEL

### YAKAM KELO i raitim

NCD Pablik Sevis Soka Asosiesen i kamapim planti kain kain prais pinis long givim i go long olgeta pilaia na tim long dispela 1996/97 soka sisen bilong ol bihain long gren fainel long dispela wiken Sarere.

Bung bilong PSSA long dispela wik Mande i tokaut olsem bai i gat prais bilong gutpela golkipa, gutpela fulbek, midfilda na straika. Bai ol i glasim ol pilaia long stat bilong soka resis ya long 1996 las yia i kam inap long dispela wiken taim pilai i pinis long gren fainel.

Bai i gat ol prais bilong ol tim. Ol tim bai kisim prais bilong ol long kamap olsem pul sempion o maina primia. Wantok i save olsem Edukesen man na meri i winim dispela prais bilong pul 1. Na long pul 2 em ol man Woks na ol meri NPF.

Long dispela wiken bai gren fainel i kamap long Bisini soka graun we ol tim bilong ol manmeri bai salens long winim Kap, Plet na Bowl.

Wantok i klia olsem gren fainel bilong Kap em ol meri NPF bai traim ol susa bilong Air Niugini na Kap fainel bilong ol man em Air Niugini bai traim ol telefon boi bilong PTC. Presiden Steven Nion i tokaut long Mande miting olsem insait long dispela gren

fainel long dispela wiken, bai i gat bikpela was bilong ol polisman na sekyuriti gad wantaim foapela dok. Na ol bai sekim olgeta bek long rausim ol bia na ol kain strongpela dring bilong spak. Na tu bai-ol i rausim ol spakman i stap ausait long pilai graun. Bikos ol i no inap long larim ol spakman i go insait long pilai graun.

Mista Nion i tok bai geit fi long dispela wiken gren fainel i stap long K2. ol bikpela manmeri na K1. long ol studen wantaim aidi kat. Wanpela bikpela senis tu em ol tim husat i win long dispela gren fainel bai kisim wanpela Kap we ol bai holim long klap bilong ol olgeta taim na tingim win bilong ol. Na narapela kap bilong asosiesen em ol bai holim tasol long pinis bilong gren fainel na givim i go bek long PSSA long ol i ken pilai long em gen long narapela sisen.

Tasol narapela kap bai i ken dai long han bilong ol. Dispela wiken bai i gat mak olsem 12-pela tim i kik long wanwan gren fainel bilong ol. Tupela tim bilong ol meri na man bai kik long winim Bowl, tupela tim bilong ol meri na man bai kik gen long Plet gren fainel na las tupela tim bilong ol man na meri bai kik long winim Plet long mein gem. Dispela olgeta pilai bai kamap long Sarere long Bisini soka graun.



• Pombuai Pepi bilong PTC i redi long kikim bal i go long wanpilaia bilong em. Em bai soim stailgem long dispela wiken gren fainel egens Air Niugini.

## Balus boi bai flai antap long telefon boi

### PABLIK SEVIS SOKA

#### NABIBING SUHII i raitim

AIR NIUGINI soka tim bai pilaim PTC long Kap gren fainel long NCDC Pablik Sevans soka resis long dispela wiken long Bisini soka graun.

Ol manmeri bai witesim tupela strongpela tim insait long pablik sevis soka resis long traim pilai long autim Kap bilong 1996 1997 soka sisen.

Air Niugini i kamap olsem feveret long wanem ol i gat ol gutpela pilaia olsem Clement Anisana, na Ben Luluai husat save lukautim beklain bilong ol. Ol sapot pilaia bilong Air Niugini em Paul Petilau na Geoge Bukoya yet husat bai kamapim. birua long PTC tim. Na tu ol straika bilong ol i save flai olsem balus na dispela tasol bai givim hat taim tu long ol beklain bilong PTC. Ol beklain bilong PTC olsem Jacob Matambuai, Pombuai Pepi na John Peter i mas was gut long dispela o nogut bai ol i kisim taim.

PTC bai putim olgeta bilip bilong ol long yangpela golkipa Moses Taian long stopim ol bal na kik bilong Air Niugini.

John Tutumang, Ezerom Toligur na Steven Tilip bilong PTC i mas putim bikpela salens long ol fulbek bilong Air Niugini long dispela salens long traim autim dispela taitel.

Air Niugini i bin sempion bilong dispela soka resis bilong ol pablik sevans long las yia. Na PTC i bin maina primia.

PTC na Air Niugini em tupela strongpela soka tim bilong NCD Pablik Sevis soka resis na ol manmeri bai amamas long lukim wanpela gutpela na strongpela gren fainel long dispela wiken.

Long Kap fainel bilong ol meri, Air Niugini bai i traim bun bilong ol NPF. Tupela susa, Tabitha Suwae na Rose Binding wantaim bai i givim het pen long ol meri NPF long wanem tupela i gat spit na bal kontrol. Tupela bai i kisim helpim i kam long midfilda Betty Waiwai.

Ikanau Matangiau, Ngahan wantaim ol meri bilong em long NPF bai i wok ovataim long stopim ol ran bilong tupela susa bilong Air Niugini ya na ol smok balus meri bilong ol. Matangiau, Ngahan i mas kisim bekap sapot long Tracey na Eunice Tarutia long holim ol Air Niugini. Na sapos i gat sans ol i ken traim long brukim umben bilong ol Air Niugini meri.

Tasol golkipa bilong Air Niugini Helen Puhiri em hap meri tu long daiv na kalap long bal. Dispela pilai bai i wanpela strongpela pilai tru. Husat i skoa pas bai inap long winim dispela pilai.

Long Plet fainel, mama Monica bai i go pas long ol redio m eri bilong NBC long bungim Habas Bod. NBC i feveret na i luk olsem golkipa bilong ol Habas Bod Martha Sala bai i kisim taim long ol strongpela lek bilong ol meri NBC olsem straika Fiona na Julie Alau na Judith Michael.

Dispela gren fainel long wiken bai pinisim olgeta soka resis bilong NCD pablik sevans soka resis long las yia 1996 i kam long dispela yia 1997.

## PTC katim telefon waia bilong NCDC

PTC soka tim bilong Mosbi pablik sevis soka resis i autim NCDC long penalti kik 3-0 long winim sans bilong kik long gren fainel dispela wiken. Dispela i win wanpela gutpela pilai tru long las wik Sande apinun insait long semi fainel taim PTC na NCDC i brukim bun long husat bai i pilai long gren fainel bilong NCD Pablik Sevis soka resis long Mosbi.

Dispela semi fainel pilai i mekim ol sapota bilong tupela tim wantaim i bikmaus i go i kam. NCDC i bin gat planti i sans long skorim gol tasol ol straika bilong ol i no save makim kik bilong ol stret long golmak bilong PTC.

Ol manki PTC tu i wankain. Eserom Toligur, Steven Tilip na John Tutumang i lusim planti gutpela sans bilong ol long putim gol.

Tupela golkipa Francis Kupe bilong NCDC na yangpela Moses Taian bilong PTC i stopim ol bal gut tru.

Pilai i bin tait tru na nogat gol i kamap long namba wan hap na tu long namba tu hap bilong pilai.

Olsem na referi i kisim pila i go gen long ekstra taim we ol NCDC i senisim golkipa bilong ol. Kupe i go aut na wanpela yangpela boi i sanap long mak.

Swipa bilong NCDC Jackson Ngahan i pilai gut tru wantaim midfilda bilong em Joe Aisa na kepten Oni Masu tasol ol straika tasol i no sutim gut bal.

Long arapela sait Jacob Matambuai i sanap strong long beklain bilong PTC na tu kisim gutpela sapot tru long Pombuai Pepi, Joe Ginisi na kepten Gabriel Rooney.

Olsem na pilai i strong tru inap ekstra taim tu i pinis na nogat gol yet.

Nau ol i kisim penalti kik na Taian yet i tok na PTC i autim tiket bilong NCDC 3-0.

Em (Taian) i stopim tupela gutpela kik bilong NCDC na wanpela i go ausait. Tripela kik bilong PTC i go insait long umben bilong NCDC.

PTC nau bai bungim Air Niugini long Kap gren fainel long dispela wiken.

Air Niugini i bin winim NBC long Sarere na long Sande ol i flaim ol Edukesen i go bek long skul wantaim 3 gol long fultaim. Edukesen i bekim wantaim wanpela gol tasol.

Long kap pilai bilong ol meri, Air Niugini i bomim Edukesen wantaim wanpela gol. Edukesen i no gat bekim. Narapela pilai bilong ol meri long Kap em NPF i winim PNGBC 3-0. NPF nau bai bungim Air Niugini long gren fainel long dispela wiken.

Long pilai bilong ol meri long Plet, NBC i winim Attorney General 2-0. Olsem na ol redio meri bilong NBC nau bai pilai egensim Habas Bot long gren fainel bilong Plet long dispela wiken.

# Mommers i winim presiden gen

PETER MOMMERS i winim sia bilong em gen olsem presiden bilong Papua Niugini Football Asosiesen.

Mommers i win taim bikpela kibung bilong PNGFA long Goroka las wik i makim em. Em i autim tiket bilong Dokta Malai bilong Mosbi. Tupela vais presiden em Kathy Davani (sinia) bilong Mosbi and Paul Kapi (junia) bilong Wau, Morobe.

Paul Pondo em i kamap tresera bilong PNGFA na Edris Kumbuwah i kamap olsem ekting sekretari. PNGFA i no makim sekretari bikos ol i no stretim yet ol pepa bilong haus, mani na ka bilong en.


Olpele pilaia bilong Westpac long Mosbi Mary Albaniel i kamap nupela kodineta bilong soka bilong ol meri. Em i kisim ples bilong Kathy husat i bin

holim tupela wok olsem kodineta na tresera.

Mommers nau bai holim wok olsem presiden long 4-pela yia na bihain ol i ken holim nupela ileksen. Planti ol soka sapota bai askim watpo na 4-pela yia. Mommers i tok dispela em long givim moa taim long eksekutiv long mekim wok bilong ol.

NCD Pablik Sevan Soka, Pot Mosbi, Lahi, Wabag, Simbu, Madang, Kaiapit na Gaifarwap. Morobe Soka Federesen i sindaun tasol long miting ya.

Lae Football Asosiesen (LFA) i no bin kamap long dispela miting long Goroka bikos ol i no baim afiliesen fi. John Peka wanpela mausman bilong LFA i bin stap long dispela miting olsem mausman bilong Morobe Soka Federesen.



• Peter Mommers.

## Broncos na Kaubois opim ai bilong PNG

OL MANMERI long Mosbi lukim stret ol biknem ragbi pilaia bilong Australia i pilai long las wikeri Sande long Sir Hubert Murray Stadium.

Olgeta manmeri i bilip tru long lukim ol biknem ragbi pilaia ol i save lukim tasol long TV o ritim long niuspepa na lukim ol poto bilong ol. Na dispela bikpela nem ragbi tim bilong Australia olgeta manmeri i save singaut long sapotim o egen-sim long TV em Brisbane Broncos, las wik Sande tasol olgeta manmeri long Mosbi i lukim stret. Yumi olgeta i save olsem Brisbane Broncos em biknem ragbi tim bilong Australia.

Na ol bikpela nem ragbi pilaia olsem Alfie Allan Langer i kamap na ol manmeri i lukim em stret long ai bilong ol. Ol biknem pilaia olsem Glen Lazarus, Steve Renoulf, Andrew Gee, Michael Hancock, Wendel Sailor wanpela blakman na Antony Mandune husat i pilai las yia wantaim St George i kamap pilai long las wik.

Dispela i bin namba wan gem bilong Supa Lig ragbi resis we Brisbane Broncos na

### RAGBI LIG RIPOT

Kwinslen Kaubois i kamap hia long Papua Niugini na pilai.

Tupela tim wantaim i soim tru ol manmeri bilong Papua Niugini long kain stail' na strongpela pilai bilong ol i long Australia. Broncos i soim pawa bilong em tru long ai bilong ol manmeri PNG olsem ol i gat nem long pilai ragbi. Yumi save lukim ol i pilai long TV na ol i save win em i no giaman. Ol i strongpela tim tru.

Strongpela ron na bal i flai long narapela sait i go long narapela sait kwiktaitim tru na kirap nogut ol fowet i flai i go bamim na brukim difens bilong Kaubois na Allan Langer yet i wel insait long spes na i go pundaun long trai lain bilong Kaubois na kamapim namba wan trai bilong Broncos. Dispela i mekim skoa i go antap long 4 na kik i go insait olsem na skoa i go moa logn 8 na Kaubois 0. Ol manmeri sapota bilong Allan Langer i bilip olsem Langer em man nogut tru long pilai ragbi. Olgeta taim bal i pundaun long han bilong Allan Langer, ol

sapota bai singaut narakain olsem trai i kamap pinis.

I no longtaim gen Broncos i go putim narapela trai gen we Antony Mandune i saitim saitim ol pilaia bilong Kaubois na i go putim trai. Kik i go insait na Broncos i go pas wantaim 12 nil skoa long namba wan hap bilong pilai.

Long namba tu hap bilong pilai, ol boi bilong Kaubois i kamapim strongpela banis na tu ol i stat long pilai strong moa. Ol fowet bilong Kaubois i stat long mekim planti strongpela ron i go insait long banis bilong Broncos. Ol i stat long tromoi bal i go i kam na tromoi bal hariap hariap na ron wantaim. Olgeta taim ol i mekim olsem, ol i wok long srukim difens bilong Broncos i wok long go bek klostu long trai lain. Dispela stail bilong pilai i mekim na Kaubois i kikim bal i go antap na kalap holim na pundaun stret long trai lain bilong Broncos. Kik i no go insait long skoa i stap Broncos 12 na Kaubois 4. Pilai i go strong moa na ol sapota bilong


Kaubois tu i planti moa. Olsem na nois i wok long kamap bikpela long sait bilong Kaubois. Long dispela taim, Kaubois i putim kamap narapela trai gen. Tasol kik i no go insait long olsem na skoa i stap long 8.

Tasol Brisbane Broncos i luk-save long dispela hevi we i kamap na ol i taitim banis bilong ol strong moa. Na dispela taim Allan Langer husat em kepten tu i stat long soim moa stail bilong em long pilai. Long dispela na em Broncos i pasim pilai wantaim wanpela las trai. Kik i no go insait tasol fultaim skoa i bin Brisbane Broncos 16 na Kwinslen Kaubois 8 long fultaim.

Moa long 10,000 manmeri i bin pulap tru long stadium long lukim dispela pilai na sapotim ol feveret pilaia na tim bilong ol.

Dispela pilai tu i mekim ai bilong ol manmeri PNG i op na dispela em i kirapim tingting na sapot bilong ragbi long PNG. Maski Supa Lig i bruk long Australia Lig (ARL) ol manmeri i soim olsem i no nem bilong lig ol i wari tasol pilai em bikpela samting ol manmeri bai laikim long lukim na sapotim.

## STORI BILONG PILAIA



NEM: Linda Joy Jagui

KRISMAS: 21 (singel)

PLES MAMA KARIM: Mosbi

FEVERET KAIKAI: pis na saksak

PROVINS: Manus

SPOT: Soka

KLAP: Tarangau Mosbi

POSISEN: Swipa (fulbek)

MAKIM TIM: Makim Manus skwat na go kik

long Wabeg.


LAIK LONG MEKIM: Harim musik

FEVERET KOSA: John Patron

FEVERET OVASIS PILAIA: Pele

BIHAIN TAIM: stap long skwat na makim PNG

ROBERT KANABOTE i raitim



NEM: Robert Kanabote (Trebora)

KRISMAS: 26 (singel)

PLES MAMA KARIM: Milen Be provins

FEVERET KAIKAI: yam na pis

PROVINS: Milen Be provins

SPOT: Soka

KLAP: Tarangau soka klap, Mosbi

POSISEN: Beklain na midfilda

MAKIM TIM: Madang Anda 14 skwat long 1981

i go long Lae.

FEVERET KOSA: Cletus Timus

FEVERET OVASIS PILAIA: Pele

TINGTING LONG BIHAIN: Kamap gutpela

kosa.

ANTON NAMIME i raitim

PLANTI ol gutpela samting i bin kamap long soka insait long yia 1996.

Ating ol dispela samting i helpim planti soka asosiesen i luk save long gutpela wok presiden bilong PNGFA na ol komiti bilong em i wok long putim i go insait long soka long kantri.

Olsem na insait long bikpela kibung long Goroka long las wiken, planti soka asosiesen i putim sapot bilong ol i go olsem bai presiden Peter Mommers bai i gat het yet long lukautim wok soka insait long kantri. Ol sampela olpela komiti memba bilong em i kam bek na wan wan ol nupela memba tu i kam insait long helpim em ranim wok soka.

Sampela ol olpela memba olsem Misis Cathy Davani i stap long komiti. Dispela meri i putim planti taim bilong em i go insait long wok lukaut bilong soka.

## Amamas na sapotim nupela PNGFA komiti

Olsem na em i gutpela olsem planti soka asosiesen i sapotim em long i stap yet long komiti long helpim Mista Peter Mommers.

Wanpela nupela komiti memba em, Paul Pondo. Dispela man tu em i wanpela long ol man i go pas long Lahi soka na i gat gutpela eksperiens long wok soka, edministresen na referi. Em bai gat gutpela aida long putim i go long PNG soka.

Dispela em i no presiden na ol komiti bilong em tasol bai lukautim wok soka nogat. Wanem man o meri i gat aida i ken rait i go insait opis bilong PNGFA long Pot Mosbi na seketeri i ken salim long ol komiti memba i skelim ol aida na lukim sapos ol inap yusim nau o long taim bihain.

SEKIM  
TINGTING  
wantaim  
GABRIEL  
PISE



Wanpela man mi ting planti ol soka senta i no yusim em tumas em Geoffry

Gideon bilong Nesenel Spoting Institut (NSI) long Goroka husat i lukautim wok soka. Mi save olsem em i save raitim raitim

sampela ol nius long soka. Mi ting olsem em bai amamas tru long lukim kainkain nius i go kamap long em.

Narapela samting we president wantaim ol komiti bilong em i ken mekim em long salim aut nius leta o pas long ol memba asosiesen olgeta mun na kisim tingting o toksave long wanem ol wok i kamap long soka. Planti toktok na nius i kam long FIFA tasol PNGFA i mas skelim wanem kain stori o nius bilong kisim na salim aut i go long olgeta asosiesen.

Dispela i min olsem opis bilong PNGFA i mas wok strong olgeta mun long autim nius. Wanem ol liklik pas i kam, sapos opis bilong PNGFA inap bekim, ol i mas bekim. O sapos em i bikpela




samting tumas na i mas gat tok oke bilong presiden pastaim bipo i go aut, orait, salim i go long presiden na em i ken sain na opis i salim aut kwik.

PNGFA i mas wok strong long litimapim' wok bilong em long opis, wok bilong bungim olgeta senta na lukluk strong long amamasim ol spona. Opis bilong PNGFA i mas salim liklik toksave olgeta tripela mun i go long husat i tingting na putim spona moni i kam insait long soka.

Long dispela we, ol i ken save long wok kirap insait long soka na tu sapos ol i gat samting tingting long kirapim soka, yumi olgeta i mas skelim na traime ol aida bilong ol spona

Mi tok amamas long presiden Peter Mommers na olgeta komiti memba husat i winim ileksen antap long Goroka long las wiken.

# WANTOK SPOT



# PNGFA bai wok strong long yut soka

PNGFA soka presiden Peter Mommers i gat bikipela tingting nau long strongim yut soka insait long kantri. Mommers i tokaut long dispela tingting bihain tasol long em i winim ileksen las wik long stap yet olsem presiden bilong PNGFA inap yia 2001.

Mommers husat i gat bikipela amamas long kisim bek wok bilong em i tok bikipela tingting nau em long strongim na developim yut soka insait long kantri. Dispela em long strongim 5 Yia Plen bilong Yut Developmen Progrem i stap pinis.

Long mekim dispela i wok, bai PNGFA i wok strong long painim wanpela sponsa bilong lukautim ol wok ol kosa na referi. Long dispela, PNGFA i ken salim ol kosa na referi i go long ovasis long kisim moa trening na moa eksperiens long strongim soka insait long PNG. Narapela tingting Peter Mommers i gat long en em long

## ...Mommers na ol nupela eksekutyutiv

### YAKAM KELO i raitim

kirapim Nesenel Lig soka resis. Dispela pilai bai i stap namel long Lae, Hailans, Mosbi na Niugini Ailan rijen. Tasol PNGFA bai holim toktok gut wantaim ol dispela asosisen na rijen pastaim long kamapim dispela pilai. Dispela pilai bai sut long pulim ol sponsa long sapotim ol dispela asosiesen o rijen long kik insait long dispela resis bilong nesenel lig.

Insait long nupela eksekutyutiv bilong PNGFA, Peter Mommers i kisim bek posisen bilong em olsem presiden wantaim 9 vot. Em i winim kendidet bilong Sauten rijen husat i kisim tripela vot.

Insait long nupela straksa bilong PNGFA, ol dispela posisen i kamap

pinis. Olsem na ol eksekutyutiv insait long ol dispela posisen em; Cathy Davani husat em tresera bilong PNGFA long olpela eksekutyutiv i kamap Sinia Vais Presiden, Paul Kabi wanpela biknem soka eksekutyutiv long Lae na Wau i kamap Junia Vais Presiden, Paul Pondo bilong Lahi i kamap tresera na tu em lukautim wok bilong ol referi, Idris Kumbrawah i stap olsem Kosa Teknikel Dairekta na Mary Albaniel bilong NCDPSSA i kamap komiti i go pas long ol meri.

Ol komiti grup bilong PNGFA em, Idris Kumbrawah bilong Nesenel Spoting Institut (NSI) Peter Pareh bilong Morobe, Paul Pondo bilong Lahi Lae na Mary Albaniel bilong NCDPSSA Mosbi.

Insait long dispela enuel jenerel miting bilong Papua Niugini Futbol

Asosiesen (PNGFA) long Goroka las wiken, Lae Futbol Asosiesen (LFA) i no bin kamap. Ol lain husat i bin kamap em PMSA, NCDPSSA, Lahi, Enga, Simbu, Madang, Kaiapit, Gaifawar na Morobe Soka Federesen.

John Peka i bin makim Morobe Soka Federesen long dispela bung olsem lukluk tasol (obseva). Ol i autim tingting long afiliat i go long PNGFA long dispela yia long stap memba long dispela yia.

Ol arapela asosiesen husat i no bin kamap em Goroka na Hagen. Tasol dispela i no bikipela hevi long mekim miting i kamap.

Taim Mommers i bin kamap presiden long 1991, taim bilong em long stap presiden i bin tupela yia tasol. Bihain ol i srukim taim i go antap long tripela krismas. Inap

las yia, mama bodi, FIFA i makim olgeta memba asosiesen i mas gat 4-pela krismas long ol opisel i stap na ronim wok bilong soka.

Mommers i tok taim em i bin kamap presiden long 1991, PNGFA i bin stap long hevi. PNGFA i bin nogat moni long staim wok o karim wok. Na tu soka i no bin kirap gut long dispela taim. Inap las yia, PNGFA i wok strong long dispela taim i kam inap las yia we PNG i winim Melanesian Kap na ol meri i go aut long Tonga na winim Polinesia soka resis las yia.

Mommers i tok nau olgeta lain i mas wok bung wantaim na i no ken pait namel long ol yet. Ol ino ken salensim ol yet i go i kam. Tasol olgeta asosiesen na save-man i mas bung wantaim na strongim PNGFA long go het wantaim wok bilong em long kirapim soka insait long kantri.



**Redi tasol long PMSA resis...** • Foma intanesenel straika bilong PNG Buka Pasa (sanap namba 2 long lephan beksait) wantaim ol wantok bilong em Kurti Andra i redi gen long 1997 Mosbi soka resis.

## PNGRFL i kamapim nupela ragbi lig resis

PAPUA Niugini Ragbi Futbol Lig (PNGRFL) bai kamapim nupela ragbi lig resis ol i kolim Salens Kap (Challenge Cup).

Dispela ragbi lig resis i wankain olsem ragbi lig resis bilong Ingran. Dispela i min olsem olgeta tim i ken stap insait long resis ya. Sia bilong Bot bilong PNGRFL Joe Kevieme i tok dispela resis i gutpela na i ken givim sans long ol arapela liklik tim tu long resis. Nau yet, PNGRFL i wok long painim sponsa bilong dispela Salens Kap. Dispela Salens Kap bai helpim tru ol liklik senta na PNGRFL i laik yusim inta siti kompetisen long makim ol Kumu pilai. PNGRFL tu bai kamapim gen Kambris Kap. Dispela resis tu bai helpim olgeta memba lig bilong PNGRFL. Ol sempion tim tasol bai stap insait long dispela resis. Resis i bin ran gut tru tasol i bin dai long tupela yia i go pinis.

Kevieme i tok em i laik givim moa sans long ol memba lig long stap tu long ol resis bilong PNGRFL.

Insait long ol arapela nius, Papua Niugini bai holim wanpela wol kap gem long neks yia olsem stenbai bilong Australia. Australia bai holim dispela ol gem tasol Intanesenel bot i laik givim sans tu long arapela kantri long PNG na Nu Silan. Kevieme i tok Intanesenel Ragbi Lig bilong Supa Lig i bin holim wanpela miting long Townsville, Australia, na i bin strongim tok olsem PNG bai holim tu wanpela gem bilong wol kap.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.